

國粹叢書第三集

剗灰錄

國學保存會印行

626.806
124

部灰錄目次

永明王僧號始末

亾國諸人事考

何騰蛟
張家玉
楊畏知

塔蔭錫
陳邦彥
沐天波

瞿式耜
李元蔭
李定國

附張同儉
王祥

陳子壯
楊展

大臨始末

舟山始末

延平始末



3 0471 4724 8

刊

行

劫灰錄

珠江寓舫偶記

順德鄧

實校錄

永明王僭號始末

故永明王由振明神宗之孫桂恭王常瀛少子也明神宗五子長光宗次福王常洵次瑞王常浩次惠王常潤而常瀛最幼與惠王同李貴妃出萬曆二十九年冬十月已卯俱受封至四十二年福王先就國洛陽熹宗天啟七年瑞惠桂三王始各就國賜予祿入不能比福藩十一而瑞國漢中惠國荊州桂國衡州地皆荒瘠衡在江湖之表尤爲僻遠焉崇禎十四年李自成陷洛陽福王常洵見殺是時秦楚交誑惠王常潤走湘潭瑞王常浩走重慶十六年張獻忠陷衡州桂王常瀛由永州入粵西獻忠毀桂邸木石至長沙造僞殿王遂寄食蒼梧我

清順治元年敗逆賊李自成於山海關中原底定福王子德昌王由崧僭位



於江南

順治二年乙酉

江南稱弘光元年

王師下江南廣東在籍尙書陳子壯以桂王常瀛

神宗子宜立會唐王聿鍵

僭位于閩議遂寢是年桂王常瀛薨于蒼梧遂

葬焉

號興陵

二子長安仁王由棧永明王由根其次也

順治三年丙戌

福建稱隆武元年

秋七月大兵至延平執唐王聿鍵粵中總督丁魁

楚巡撫瞿式耜

巡按王化澄與故臣呂大器李永成晏日曙湯來賀董天

閔朱容藩林嘉鼎方以智程源等議所立時安仁王由棧病卒乃共推永

明王由根桂太后王氏曰諸君子何患於無君吾兒仁柔非撥亂才也願

更擇可者魁楚等請之堅遂以十月十四日稱監國於肇慶以魁楚大器

爲大學士并典樞務晋式耜爲侍郎署吏部事永茂請終制化澄以下皆

晋爵諡唐藩曰思文末幾贛州報至唐藩故相蘇觀生粵人也以擁護入

閩功授大學士回粵督師援贛駐南安不敢進是月四日大兵破贛州督

師閣部楊廷麟萬元吉監軍御史姚可蔭主事龔棻黎遂球等俱死之觀
生撤兵度嶺丁魁楚故與觀生不和兼聞贛州啟信倉卒奉永明王走梧
州已而蘇觀生使陳邦彥勸進復回肇慶十一月唐王弟聿錫浮海至廣
州蘇觀生雖勸進終忌丁魁楚不肯過肇慶自南韶徑回廣州會聿錫至
遂與布政使顧元鏡總兵林察等謀立之曰吾君之弟也僭位置六卿改
元紹武召海上鄭石馬徐四姓盜授總兵等官與肇慶相距是月肇慶永
明王亦僭號改元永曆使給事中彭耀赴廣諭蘇觀生被殺乃以兵侍郎
林佳鼎督總兵李明忠龍倫蘇聘等赴三水佳鼎故粵中監司與林察同
姓相善察使四姓盜詐降迎佳鼎佳鼎信之舟至三山口亂作全軍俱沒
佳鼎赴水死肇慶大震復以王化澄爲兵侍郎代林佳鼎督師大學士掌
樞呂大器以病辭入蜀化澄遂晉尙書起復李永茂爲大學士知經筵未
幾亦罷去十二月我

清巡撫佟養甲總兵李成棟由閩趨潮惠俱下之潛師襲廣州望日紹武方
 視學警報至蘇觀生叱曰潮州公文昨日到兵何自來耶已而騎抵東郭
 門守門者猶以為招來海上盜也呼問之比覺而城不及閉先鋒入返據
 城以引外騎觀生急調兵兵舉四出猝難集頃之僅得數百人我兵下城
 擊之皆散走因盡入城執聿錫蘇觀生自縊祭酒梁朝鍾太僕卿霍子衡
 等死之餘皆降聿錫與周益遠等二十四王俱及于難二十五日報至肇
 慶瞿式耜請守峽口司禮監王坤難之乃以朱治澗為兩廣總督守肇慶
 永明王走梧州

順治四年丁亥廣西稱永曆元年春正月李成棟分兵徇南韶自率兵向肇慶朱治

澗走永明王由梧州北走平樂丁魁楚辭入岑溪縣守險王化澄走潯州
 李成棟至肇慶別遣副將楊大福張月等徇高雷廉三府自以二十九日
 入梧州廣西巡撫曹煒降二月永明王入桂林遣使湖南慰勞督師定興

侯何騰蛟等并趣其兵入衛徵四川文安之雲南王錫袞入閣以周堪庶
郭都賢劉遠生等爲六卿丁時魁金堡爲給事是時孫可望等方由川貴
入雲南王錫袞以道阻不能達文安之亦未至丁魁楚在岑溪爲李成棟
所誘見殺於藤江平樂亦不守永明王在桂林聞報大恐會武岡鎮劉承
蔭以兵至全州內監王坤請赴之瞿式耜諫不聽式耜因自請保桂林與
城同存亡乃以式耜兼吏兵兩部尙書督師留守以焦璉爲總兵隸麾下
封舊鎮陳邦傳爲思恩侯守昭平王自桂林趨全州三月封劉承蔭爲安
國公錦衣指揮馬吉翔郭承吳巖雲從等皆爲伯御史毛壽登爭之吉翔
怒激劉承蔭脅王杖壽登併及劉湘客吳德藻萬六吉等從官論救得免
吉翔本廣東都司以解靖江王至閩授錦衣至是因內閣乏員賁綠掌絲
綸房事司票擬焉劉承蔭以三千人援桂自奉永明王歸武岡以巡道嚴
起恒爲大學士大兵攻桂林瞿式耜與焦璉悉力守禦武岡援兵以乏餉

潰歸桂林垂破會廣東陳邦彥以甘竹灘余龍兵犯廣州李成棟留兵屯陽朔自率大部東回未幾張家玉陳子壯等兵俱起陷東莞高明等縣成棟往來追擊不能復西桂林稍定是時定南王孔有德靖南王耿仲茂平南王尙可喜等統大兵下湖南何騰蛟與郝永忠等退保衡州張先璧走寶慶湖北巡撫堵蔭錫走永定衛忠貞營李赤心等犯荊州不克潰入歸巫兩江間馬進忠王有才等遁五溪山中先是劉承蔭在湖南受何騰蛟節制騰蛟以丙戌藤溪之捷請加郝永忠援勦左將軍張先璧援勦右將軍承蔭怨至是以長沙不守爲騰蛟罪請解其兵柄召之入輔先璧等亦抗論承蔭專權騰蛟以大義解之承蔭聞先璧兵至寶慶憂甚乃復請命騰蛟督諸鎮兵守衡五月大兵至衡永忠等戰敗俱遁走總兵黃朝選等被執何騰蛟退保永州湖南巡撫章曠卒于永安縣從者惟滇將趙印選胡一清等數千人八月大兵破寶慶劉承蔭拒戰敗績使人報武岡而後

降焉馬吉翔等以永明王夜走靖州由通道縣入蠻境出古泥以達柳州
土司覃鳴珂與守道龍文明相攻遂陷柳州鳴珂者副將覃遇春之子也
初遇春從騰蛟於楚潰歸入桂林陳兵索餉騰蛟式相俱惡之比至柳龍
文明承督府密檄佯與遇春飲解散其部曲執遇春送桂林誅之永明王
至古泥鳴珂訴冤從行者倉皇未詳其始末遂以不知對鳴珂率諸苗攻
文明文明走遂入柳州府城大掠矢及永明王舟中王南走象州時大兵
已定湖南永州亦破郝永忠盧鼎等俱入桂林何騰蛟與嚴起恒劉湘客
隨至與留守瞿式耜議分地給諸鎮俾自爲守式耜先已督焦璉兵復陽
朔及平樂府陳邦傳亦由賓州復潯州合兵復梧州粵西全省俱定屢請
永明王回桂林及騰蛟起恒等至復以爲言十一月永明王回桂林瞿式
耜與嚴起恒王化澄並相何騰蛟督師出全州王坤龐天壽掌司監事馬
吉翔內交諸閩外與陳廷傅等爲奧援專司擬票式耜等不能與比也

順治五年戊子廣西稱永曆二年春二月大兵入粵郝永忠之兵潰于興安入桂林

大掠永明王夜半走何騰蛟在永寧聞警馳回與瞿式耜同調諸鎮兵入

城守禦胡一澐焦璉等各率所部至三月二十一日大兵至桂北門何騰

蛟等拒戰遂由甘棠坡旋師蓋聞金聲桓江西反信回楚以固根本也金

聲桓使人間道賫佛經置密疏其中赴南寧輸款四月朔長子某生王氏

出也五月何騰蛟復全州六月廣東李成棟使亦至成棟自廣西回擊殺

陳子壯張家玉等擢授提督巡撫佟養甲為總督李成棟自負功高不欲

受節制又得金聲桓密書遂反使至封李成棟惠國公併封陳邦傳慶國

公金聲桓豫國公及王德仁佟養甲杜永和等為侯伯有差李成棟請移

駐廣東瞿式耜請回桂林衆議肇慶監國之地居兩省中遂移蹕焉八月

至肇慶拜李成棟翊明大將軍以其子李元蔭為錦衣指揮使掌絲綸房

事袁彭年為左都御史彭年以廣東布政與成棟密謀者也冬十月李成

棟犯贛州先是江西廣東俱反惟贛州爲高進庫所守金聲桓使王德仁
攻之不能克求助于成棟比成棟至而我朝兵已抵南昌王德仁還救
李成棟戰不利退屯南康縣十一月殺修養甲養甲爲成棟所脅反非其
本意嘗密使人北上被獲使赴梧州祭陵殺之於楊柳沙舟中召舊輔臣
何吾騶黃士俊入閣

順治六年己丑

肇慶稱永曆三年

大兵圍南昌久金聲桓告急使李成棟何騰蛟堵

蔭錫等分道援之未至南昌已破烏金王大兵南下湘潭馬進忠等敗走
何騰蛟被執不屈死之二月李成棟兵亦敗于信豐渡河墮水死事聞贈
何騰蛟與李成棟金聲桓皆王爵設壇祭之以杜永和爲兩廣總督代李
成棟駐廣州羅成耀守南雄忠貞營之衆亦潰於茶陵由道州入粵西堵
蔭錫以胡一清趙印選兵守衡州三月大兵至擊敗之堵蔭錫走道州衡
永二郡俱不守四月雲南監軍楊畏知等以僞平東將軍孫可望疏至肇

慶具爲請王封兵科金堡持不可孫可望自丁亥春入滇據有全省稱國主以干支紀年其黨李定國等抗不相下故楊畏知誘之來歸請封久不決陳邦傳中軍武康伯胡執恭駐思恩聞之謂奇貨可居便宜矯冊印入滇封孫可望爲秦王肇慶不知也六月堵蔭錫至肇慶加閣部銜使招忠貞營李赤心等出楚七月封孫可望爲平遠王賜名朝宗劉文秀李定國艾能奇等皆爲公至滇孫可望却不受是冬封黔鎮皮熊爲匡國公播鎮王祥爲忠國公防滇寇也十一月堵蔭錫卒于潯州忠貞營之初入滇也李元蔭恐爲亂請移楊大福駐封川以防之赤心等既西入福邀其守後兵五千人而東焚掠懷集四會間遠近震駭李元蔭請召楊大福入肇慶縊殺之亂始定陳邦傳鎮粵西橫州徐彪鬱林梁士奕各聚兵據境邦傳不能制聞赤心等至思借之以爲重乃與盟于平南縣以討徐彪等忠貞營遂散處賓橫境上居民苦之邦傳亦不能堪幸堵蔭錫之調出之也赤

心等殘敗之餘甫得安土不欲復出楚堵蔭錫屢檄之不應竟以憂死十
二月我

清平靖兩王下廣東羅成耀自南雄遁回

順治七年庚寅

肇慶稱永曆四年

正月聞庾關失守問備禦之策無對者七日登舟

十四日韶州復破十七日舟發自肇慶留馬吉翔李元蔭居守二十六日

至梧州駐舟江干內閣黃士俊以疾歸二月平靖兩王兵至廣州圍之調

陳邦傳高必正等東援邦傳久與東鎮構隙且怨金堡等之善元蔭也奉

調赴梧意在修怨迎其意者遂以事論堡等因杖堡及侍郎劉湖容給事

丁時魁蒙正發等遣戍之五月高必正亦至時李赤心已死必正代掌軍

政其黨張良籌四虎等一時物故必正疑邦傳藥殺之邦傳亦憾必正等

久擾其境陰使其將姚春登連結土司以誅流賊爲名會李來亨馬騰雲

等調兵土司遂相讐殺必正怒歸罪邦傳率所部西回惟邦傳東出駐清

遠馬吉翔等駐三水俱觀望不敢進廣州被圍日久以城守功進杜永和等爲侯八月孫可望復遣使至梧自稱秦王且以不願改號爲請付從官集議王化澄朱天麟等以爲許之便惟嚴起恒文安之郭之奇以爲不當許時兵侍郎萬翱掌樞事徐極爲兵科皆王化澄同里故力主化澄議已允行矣七月颶風盪舟求直言郭之奇言風變由滇封也議遂寢已而籍川黔者又乞允可望請以通道西南嚴起恒難之會內江楊鼎和至梧力言封王之非起恒悅授鼎和兵部尙書又轉劉堯珍爲兵科給事中而萬翱徐極之說遂不行九月孫可望由雲南東襲貴州皮熊走清浪可望使白文選追執之奪其兵又使賀九義將兵趨遵義王祥師敗自刎死于是張先璧馬進忠等由湖南入黔皆歸於可望勢益強地與粵西相接矣十一月二日大兵克廣州范承恩迎降杜永和率舟師下海奔瓊州五日定南王兵入桂林留守瞿式耜總督張同儉俱死之初長沙旣破胡一清趙

印選等南走粵衡永各郡盡不守式耜分佈一清印選與焦璉楊國棟等
兵扼榕江既而全州復破榕江兵盡潰胡一清趙印選走柳州焦璉走修
仁楊國棟走慶遠報至梧州乘砲船夜發比曉從官踉蹌追走陳邦傅在
清遠聞廣州失飛帆先歸邀結從官于藤江殺部郎潘駿觀童英許王鳳
等內閣王化澄吏部尙書晏清等俱走北流不得達馬吉翔李元蔭追及
於南寧從官稍集飢凍無人色括行橐併馬吉翔所獻得四千金散給之
胡一清趙印選率滇兵駐賓州

順治八年辛卯

南寧稱永曆五年

三月使編修劉蒞赴黔封孫可望爲翼王至平越

不得入先是孫可望以不遂允秦封切齒已久楊畏知曰秦固美號然假

何如真孫可望終不悅楊畏知因請再至南寧議之孫可望使賀九義張

勝張明志等將兵護衛實令求阻秦封者而甘心馬九義至使人盜殺楊
鼎和於崑崙關與嚴起恒議不合卽舟中殺之投屍於水流三十里虎負

之置岸上而去劉克珍吳霖張載述等俱被害吳霖張載述本不阻秦封
 以霖常劾陳邦傳載述常劾朱天麟二人皆主秦封者也故并及焉於是
 始真封孫可望為秦王楊畏知留南寧可望召回黔殺之九月陳邦傳叛
 降于定南王南寧震怒議奔廣南自瀨灘發舟距追兵止五十里趙印選
 胡一清以叛卒同馬吉翔抵駐灘請棄舟從陸由土司安平下雷歸順歸
 潮一路進發諸蠻各供糧餉并從官夫役孫可望既受秦封遣其將狄三
 品陳國能高文貢等來迎并致書從官曰南寧不守當走安隆從之是時
 孫可望已由遵義北擊于大海李占春於重慶破之據有川東復遣王自
 奇劉文秀分身取黎州及嘉定獲袁韜武大定以歸總督李乾德赴水死
 留兵守川西

順治九年壬辰

安隆稱永曆六年

春二月永明王至安隆改名安龍府孫可望歲以

銀八千兩米百石上供從官取給焉平西王吳三桂由漢中從定西將軍

墨勒根蝦統兵入四川孫可望守將白文選走回雲南定南王孔有德自
廣東以七百騎出河池州向黔大軍駐柳州接應孫可望乃議內犯使李
定國與馮雙禮由黎平出靖州馬進忠由鎮遠出沅州會於武岡以圖桂
林步騎八萬人劉文秀與張先璧由永寧取叙州白文選由遵義取重慶
會於嘉定以圖成都步騎五萬人疏聞安隆封李定國爲西寧王劉文秀
爲南康王餘各加公侯從孫可望請也五月李定國等進攻靖沅武岡皆
下之定南王還守桂林定國由西延大埠疾趨廣西我師遇於全州不利
復敗於岩關七月四日遂陷桂林定南王死之獲陳邦傳并其子曾禹送
貴州殺之劉文秀陷叙州白文選陷重慶平西王等回兵保寧文秀由嘉
定成都追至保寧大兵出擊大破之劉文秀等奔還全軍俱沒孫可望請
削其王爵俾回守雲南九月李定國北取衡州自南寧旣敗胡一清趙印
選馬寶曹志建等尙留粵西屯聚山谷聞李定國至皆相率來歸民間亦

多嘯聚以應者聲勢大振孫可望亦至自沅州使白文選張虎攻辰州府
陷之殺鎮守總兵徐勇湖南猝不意賊至長岳一帶俱奔潰我

大清敬謹親王率大兵南下十一月三日遇李定國於衡州城大戰竟日定
國不能支遂敗走王自率精騎追之去其大軍數十里過險遇伏爲交槍
所中李定國得收兵退屯武岡

順治十年癸巳

安隆稱
曆七年

永春李定國復回廣西初定國自桂林勝後不復稟

孫可望約束馮雙禮與爭鹵獲益相搆可望惡之其在武岡也使人召之
赴沅議事將因其敗以爲罪而殺之李定國覺其意辭不行遽率殘兵五
萬人走東安全州入粵可望自率兵追之我師雖失大帥固山佟圖賴等
仍進兵寶慶與可望遇於花街子孫可望將中軍馮雙禮軍左白文選軍
右楊武馮萬實在可望後我師望見可望龍旗盡力攻之殺傷相當孫可
望忽自走入楊武軍諸營見龍旗走遂俱潰惟馮雙禮一軍不動我師鑒

衡州之事亦不追各引還以武贄之間爲界李定國得據有廣西與馬
等由懷集東攻肇慶圍之平南王尙可臺率師來援相持不能克永明王
在安隆日益窮促聞李定國據有廣西且與孫可望有隙謂內監張福祿
全爲國曰秦王見待無人臣禮安危不可知得西府以兵迎庶脫于險西
府謂李定國也時內外多爲可望耳目者惟吳貞毓由吏侍郎入內閣素
懷忠憤福祿等與之商併約內翰蔣乾昌李元開給事張鐫御史李願胡
士瑞部郎徐極楊鍾趙廣禹蔡紬鄭允元周允吉朱議景朱東且任斗墟
易士嘉等與謀以馬吉翔與內監龐天壽素附可望恐洩其謀乃議先移
天壽于外又使馬吉翔赴南寧省墓至十一月密使林青陽赴廣西召李
定國入衛許封晉王復使周官申諭焉情詞哀切李定國受讀感激泣數
行下軍中皆流涕顧念兄事可望久未肯輕舉發有劉議新者自行營回
過南寧爲馬吉翔言其狀吉翔雖赴南寧留其弟雄飛在安隆覘動靜乍

聞劉議新之言大驚曰不早自爲地事發禍且及我輩矣陰使提塘王愛秀報孫可望又諷劉議新具疏安隆爲他日左驗孫可望聞之大怒使人邀林青陽周官執之併執馬吉翔赴黔以待對理實厚待吉翔云

順治十一年甲午

安隆稱永曆八年

三月孫可望使鄭國王愛秀至安隆言李定國

私通奸臣要脅封爵今使者已被執供明乞查發同謀者付之以報國主國主謂可望也永明王謝曰事非內人所敢爲假勅假寶外間多矣鄭國

等怒而出執內閣吳貞毓械繫之復率兵入內縛張福祿全爲國而出兵

侍郎冷孟銜等請曰事急矣諸臣不足惜恐并及於難奈何永明王曰我

實不知何所言鄭國等拷訊吳貞毓備苦毒貞毓曰我備員爲相凡事自

主之上下無與者然大壽雄飛已密探同事者姓名先報可望竟依數執

之鍛鍊成獄張福祿全爲國與張鐫俱極刑蔣乾昌等十四人棄市吳貞

毓以大臣賜自盡皆慷慨賦詩安慰永明王而死安隆人哀之後爲祠以

祀稱十八先生焉孫可望憾李定國益甚顧以方將兵在外不敢輕樹敵仍厚養其妻子于雲南定國亦防可望襲之是年秋南攻廣東之高州府破之雷廉俱爲所有

順治十二年乙未

安隆稱永曆九年

孫可望遣兵犯常德復敗歸永明王在安隆塗

葦薄以處日食脫粟守將承可望意更相凌逼挾彈射鳥直入其門文吏乘輿呵殿過之不復下改稱安隆府爲安籠歲造開銷銀米冊報可望稱皇帝一員月支若干皇后一口月支若干隱忍延喘息而已李定國由高涼東攻陽春陽江陷之遂進圍新會

順治十三年丙申

安隆稱永曆十年

春新會被圍日久平南王尙可喜請大兵至擊

李定國敗之喪亾殆盡率殘卒數千奔回南寧將由安隆入滇孫可望偵知之先使白文選赴安隆促永明王移黔永明王母子聞之哭從官亦哭白文選雖爲可望用然心不直其所爲對此心動因以情告曰姑遲行俟

西府至

西府謂李定國

可無危矣遂以輿徒不集報可望陰以留侯李定國數日

定國至遂奉之由安南衛西走雲南白文選東回黔孫可望復使率兵邀

之李定國已抵曲靖時守滇者爲劉文秀王尙禮王自奇等劉文秀亦素

怨可望聞李定國至佯與王尙禮等勒兵私以數騎馳逐定國曰我輩以

秦王爲董卓尤恐卓後復有曹瞞定國爲之指天立誓劉文秀遂與李定

國白文選同奉永明王入雲南居孫可望府中賜李定國晉王册寶封劉

文秀爲蜀王白文選鞏國公王尙禮保國公王自奇夔國公餘俱爲侯伯

又以李定國記室金維新爲吏部侍郎兼都御史龔銘爲兵部侍郎馬吉

翔工彌縫仍以文安侯入閣辦事遣白文選還黔慰諭孫可望可望奪白

文選所部兵并其鞏國公印置營中然以妻子在滇未敢公爲逆也

順治十四年丁酉

雲南稱永曆十一年

春使張虎送孫可望妻子赴黔以慰安之可望

既無內顧乃舉兵反時可望所部至衆諸鎮自楚粵至者皆聚於黔從李

定國歸者不過敗卒數千人劉文秀所將留滇兵亦少忽有此變上下皆震恐然人心多不直可望馬進忠馬惟興馬寶以同姓相密又與白文選交密謀助李定國從容爲可望言文選心替舊人諸將才望無出其右者特前爲定國所脅使其心果外向必不敢復來人來而奪其兵矢歸向心試重用之必能爲國盡力可望信之乃以白文選爲征逆招討大將軍總統諸將前行自率大軍隨後留馮雙禮守貴州馬進忠以病留安順李定國劉文秀聞之亦自將至三岔相拒秋九月十四日白文選抵交水距三岔二十里輕騎奔定國軍具言人心內向可一戰走也定國悅請封文選爲鞏昌王孫可望聞變欲回馬寶佯爲切齒曰吾乃爲跋賊所欺要當手縛之生食其肉且一人去何足重輕而以廢大事耶白文選前爲賊時嘗戰傷其足醫者生截他人足以接之雖愈而跛故寶呼跋賊云可望乃止曰兩酋齊出會城必虛因使馬寶與張勝武大定問道襲雲南而身與定

國等戰兵既交馬惟興軍先走遂大敗十九日可望奔回貴州張勝至省
王尙禮謀翻城應之黔國公沐天波覺挾與入朝以兵守之王安等拒戰
於城外張勝知有備亦馳回孫可望既敗李定國慮會城有失使劉文秀
白文選東追自引兵還救根本遇張勝於渾水塘大戰竟日擒之孫可望
至貴州馮雙禮誑之言追兵將及可望知人心已散遂挈妻子赴長沙經
畧洪承疇軍前降馮雙禮斷後掩其子女玉帛同劉文秀白文選歸雲南
論功封馮雙禮慶陽王馬進忠漢陽王馬惟興叙國公馬寶淮國公賀九
義廣國公其黨附可望者皆降級冬十月遣使問道赴海封鄭成功爲延
平王

順治十五年戊戌

雲南稱永曆十二年

春正月孫可望入京封義王三月遣楚蜀粵三

路大兵入黔李定國

使其將劉正國楊武守三坡紅關諸要險防蜀使馬

進忠等駐貴州四月二十四日劉文秀病卒夔國公王自命永壽伯關有

才反殺總兵徐祐李定國自率兵討之王自奇爲亂兵所殺執關有才于永昌誅之內亂平而貴州已不守矣是月蜀兵至三坡劉正國由水西奔回雲南晦日克遵義楚兵自鎮遠抵黔馬進忠等亦走五月蜀兵擊敗楊武于開州之倒流水七月粵兵抵獨山州十月三路兵俱集信郡王奉命自北至會于楊老堡戒期入滇李定國受黃鉞與馮雙禮等扼雞公背圖復貴州別遣白文選將四萬人守七星關抵生界次師示犯遵義以牽制蜀兵十二月蜀兵出遵義由水西以烈趨天生橋入烏撒白文選懼棄七星關走回霑益泗城州土官岑繼祿導粵兵入安隆李定國使懷仁侯吳子聖禦之敗績李定國由盤江回師拒戰連敗於安隆之羅炎涼木井撒寨遂遁回十五日報至永明王先走

順治十六年己亥永昌稱永曆十三年正月三日大兵入雲南四日永明王至永昌傳諭罪已李定國還黃鉞待罪自請削秩不許二月白文選敗于玉龍關初

白文選自霑益追及李定國留之斷後大兵以二月二日出雲南十日追敗王國勛兵于普溯十五日至大理之玉龍關白文選與張光翠陳勝等俱戰敗由沙木和走鎮康土司總兵呂三桂被殺永昌聞之使沐天波馬吉翔等隨行走騰越李定國伏兵潞江之高黎貢山中十八日大兵抵永昌二十一日過潞江前驅遇伏不利適有降人洩定國謀乃分精甲先蹂其伏處而大軍由正路上殺傷相當竇名望王璽皆戰死李定國不能支復遁騰越聞報乘夜走入南甸僞平陽侯孫崇雅邀劫資裝於道中二十六日抵曩木河十里即爲緬境沐天波入諭始啟關猶勒從官盡棄所携兵器而後放入晦日至蠻漠土司思綿迎入土城蠻漠舊爲宣撫司屬永昌府自萬曆中始爲緬有三月緬酋以四客舟來迎從官自覓舟江上得從者六百四十六人故岷王子及總兵潘世榮內監江國泰等九百餘人馬九百四十餘匹俱由陸期會於緬甸十八日至井互李定國既敗於潞

江走孟定白文選走木邦已而文選以兵入緬緬使人至井互求檄止兵
文選戰不勝走回孟良四月初三日兵至蠻漠復使丁調鼎楊生芳往
止之因諭守關者已航海赴閩兵勿復來蓋緬人畏兵故馬吉翔冀以此
悅其心而不知爲其所愚也沐天波蒲縷王啟隆等謀乘間走戶獵二撒
亦不許五月四日緬復以舟迎五日發并互七日至阿瓦對江阿瓦卽緬
酋所居城也八日進赭硜知前陸行者潘世榮等被緬分給土人爲奴多
自殺惟存岷王子八十人後流入暹羅云緬人於赭硜置草房十間
編竹爲城每日兵百餘護之從官各給茅散處蠻男婦日來貿易初至饋
獻頗豐後漸薄八月望日爲彼國朝會之期逼沐天波同往行禮天波不
從強而行馬吉翔李國泰等猶以令節飲王維恭家維恭妃弟也有女妓
黎維新已老矣馬吉翔強之爲黎園舞維新泣下曰今何時願猶爲歌舞
歡耶吉翔等怒撻之蒲縷家復縱博喧呼聲徹於內時永明王方臥病不

能禁歎息而已九月緬進新稻命分給從官之窘者馬吉翔多私其親故鄧凱以爲言馬吉翔擊鄧凱傷足十月禮官請造庚子曆從之

順治十七年庚子 永明王在赭涇李定國白文選會兵攻緬索之不得敗緬兵於瑞羊岳

順治十八年辛丑 李定國與緬戰於桐垵白文選助之復敗緬兵緬終不肯出永明王從官資用盡竭有數日不舉火者出金寶付馬吉翔碎之分給人各數銖五月緬酋以老避位其弟莽猛白代立索賀禮七月復來言三載供給之勞索報禮俱無以應是月十八日請從官過河盟既出以兵圍殺之武臣沐天波馬吉翔王維恭魏豹馬雄飛王啟隆蒲纓王自京龔勳陳謙吳承爵安朝柱任子信張拱極劉相宋宗宰劉廣銀宋國柱丁調鼎文臣鄧士廉楊在鄔昌琦鄧居詔任國璽王祖望裴延謨楊生芳潘璜齊應巽郭璘張伯琮內監李國泰李茂芳楊宗華楊強益李崇貴沈猶龍

周某盧某曹某等凡四十有二人俱被害其未亂而先病故者巳亥則潘琪齊環朱仲庚子則王名偉辛丑則瑞昌王徐鳳翥劉盡忠與商某劉某二監其遇亂而自盡者故吉王及朱議漆衛所官趙明鑑王大雅王國相吳承蔭朱文魁鄭文遠李暨白凌雲尹襄吳某嚴某內官陳德遠等婦女之前後自殺者劉楊二貴人吉王松滋王妃馬吉翔四女姜承德妻王氏王啟隆妻吳氏妾周氏王國璽吳承爵之妻齊環之妾俱失其姓餘死尙多惟鄧凱以病足內監蔣進朝李猶龍李國用以老病未行得免後進朝三人亦病死止凱生還爲人述其狀如右緬殺諸人後有馳呼而來者云勿害皇帝及黔國公卽沐天波蓋恐

本朝索之思留以獻也而天波已先死乃復治天波所居室移永明王眷屬二十五人入居之并進衣食八月李定國以十六舟攻緬復爲所敗覆其五舟乃與白文選俱引還十二月朔我

朝兵至白文選自木邦降緬以永明王父子送於軍前明年四月二十五日
殺於雲南六月二十七日李定國死於猛獵其子李嗣興與劉文秀子劉
震俱降惟鄭成功子鄭錦在海外猶以僞永曆紀年非復故明子孫矣

劫灰錄

亡國諸人事考

何騰蛟

何騰蛟其先山陰人戍貴州黎平衛所居有神魚井無魚也騰蛟生魚忽滿井五色巨鱗大者至尺許居人異之登天啓辛酉賢書起家南陽令時流寇充斥至邑輒破走之後從巡撫陳必謙擊賊於安臯斬首四百級由是知名擢武庫主事累遷淮徐兵備道平土賊程宵字王道善張方造等衆數萬福王立南都擢都御史巡撫湖廣當是時諸大鎮分擁重兵所在文臣結強藩交權相構鬪湖廣新經獻賊之亂寧南侯左良玉據武昌兵衆而無紀遠近畏之騰蛟慷慨赴任日盡瘁邊事利害不問也未幾晉總督闖賊既敗潰出武關左良玉畏其逼已每欲引兵東下未有會值有自北來詐稱故太子者南都君臣惡其惑衆收下獄遠近洶洶謂奸相馬士英欲殺之左良玉乃與

巡按黃澍上疏以討馬士英爲名乙酉三月帥兵三十萬內向騰蛟百計阻之不聽先一日左兵大掠城中人倉皇入督署避難者數萬騰蛟以印授家人速持去自坐堂上亂兵入飛矢集几案不爲動左良玉使人請曰公不行不強但一語而別騰蛟赴之既登舟舟遂發使四裨將守之行四十里至陽邏鎮騰蛟罵曰吾封疆重臣豈相從作賊耶因自投於江守者懼誅亦赴水死騰蛟順流數十里遇漁者救之得甦標將熊朝佐等及故士卒聞騰蛟在稍稍來集家人亦持印至遂入大冶通山之間左兵東下甫浹旬闖賊十萬衆自陝潰入楚掠武漢而東嚙左兵之尾大兵追闖者又數萬水陸踵至計至荆河至皖城數十里間日接陣格鬪紛拏散走四月左良玉與黃德功戰大敗師潰蕪湖之荻港後數日左良玉死其子左孟庚以父兵降闖賊被追會大雨四十日百川漲盜賊敗所在積尸成丘李自成僅引數騎馳入九弓山元帝廟居民白梃擊殺之五月大兵略武漢諸城邑騰蛟自寧州間道入

瀏陽向長沙時楚人相傳騰蛟入水浮沉三晝夜不死有大龜負之登陸皆以爲神爭相向從矣先是左良玉操楚事騰蛟不能制乃請以知州章曠爲監軍道傅上瑞爲長沙道與督學道堵蔭錫各練兵一萬至是皆以兵來會未幾舊鎮馬進忠張先璧盧鼎等亦次第來歸軍聲稍振七月唐王立於閩晉騰蛟尙書兼東閣大學士封定興侯督師并以章曠堵蔭錫爲湖南北巡撫分駐湘陰常德爲犄角皆從騰蛟請也騰蛟令南陽時與王善故所陳皆報可九月降闖賊之潰將郝永忠王進才及左良玉之標將王允成等兵十餘萬堵蔭錫亦降李錦高一功等十八營於松滋之草坪衆三十萬號曰忠貞營明年丙戌騰蛟兵戰于岳州城下又戰於藤溪戰於湘陰皆捷請加郝永忠恢剿左將軍張先璧恢剿右將軍餘陞授有差江楚間民兵皆結砦固守以應方謀大發兵犯武岳及江右之袁吉會闖破贛州亦不守人心搖動兵不果出十月桂王子永明王立於肇慶丁亥正月大兵定廣東王自肇慶

奔桂林騰蛟與武岡鎮劉承蔭俱以兵赴難劉承蔭遂挾王走武岡劉承蔭者崇禎時爲武岡叅將常鑄鐵棍自隨因以爲號其後南北多故乘亂截粵餉之解北者十五萬招集士馬遂雄視湖南稱重鎮掛平蠻將軍印嘗從騰蛟戰岳州一軍先走後封賞不及遂怨騰蛟至是以擁護功封武岡伯尋進侯又進安國公大兵入長沙騰蛟戰不利退保衡州劉承蔭請召騰蛟入閣辦事實以解其兵柄諸鎮皆怒張先璧引兵趣武岡請誅劉承蔭劉承蔭懼會騰蛟至諭解之張先璧引兵掠寶慶西去劉承蔭復喜既而以諸鎮請仍以騰蛟督師出衡州而衡州之師已潰惟郝永忠王進才以兵至餘皆降五月騰蛟以衡州退保永州湖南巡撫童曠駐東安疽發背死大兵攻寶慶破之劉承蔭屢戰敗遂降永明王奔古泥大兵還攻永州郝永忠等走騰蛟獨以胡一清兵力戰城下十餘日胡一清曰吾外援已絕內儲復匱死空城無益遂擁騰蛟決圍出比至全州郝永忠已集湖南潰兵數萬入桂林城中大

沸公馳入與留守瞿式耜分佈諸將自會城之北盡全州與安靈川駐郝永忠兵城東永寧義寧駐胡一清及趙印選兵其他鎮兵自將留會城胡一清趙印選俱滇人初應御史陳賡募將三千人象十二隻至豫章隸江督萬元吉麾下及贛州陷萬元吉陳賡俱死胡一清走湖南屬騰蛟十一月永明王自象州復回桂林戊子二月大兵破全州至興安郝永忠兵大潰掠桂林而南王奔南寧騰蛟方按師永寧聞報急引胡趙之兵還保桂林會江西告變大兵俱還駐武昌騰蛟招集潰散得二萬人將出楚巡撫堵蔭錫與馬進忠等亦攻下常德報至騰蛟卽出嚴關身先士卒大戰日月橋遂復全州進攻東安破之於是舊鎮將次第自山中以師來會圍永州三閱月克之乘勝克衡州進攻長沙十一月堵蔭錫以忠貞營兵自常德趨湘潭騰蛟相見甚喜時大鎮聚湘潭者數十家最後馬進忠亦至與忠貞營有舊隙會江西被圍趨赴援騰蛟乃與堵蔭錫議自督馬進忠及諸鎮兵圍長沙堵蔭錫率忠貞

營援江西己丑正月烏金王師至湘潭馬進忠胡一清俱走騰蛟曉起營壁皆空乃大慟曰五年督師心血嘔盡而所成竟如是天也遂緋衣坐堂上去執見烏金王勸之降對曰若何患無降官降將哉果以我爲血性男子何惜一劍遂不食七日且死謂寺僧曰取一瓢河水飲我是水自衡來猶吾君之水也滌腸胃而死瞑目矣遂遇害事聞贈中湘王諡忠烈子何文瑞奪情拜都御史監胡一清軍以病卒自騰蛟死而其家之神魚井亦空無魚焉黎平破舉族見屠

堵蔭錫楚事

堵蔭錫號牧游江南宜興人登劉同升榜進士崇禎辛巳任長沙知府是年五月山賊蕭相宇等竊發擾安化寧鄉數敗官兵勢甚盛而蔭錫率鄉勇破斬之又破醴陵燕子窩賊斬其渠草上飛李鬚子等於是中外稱知兵甲申六月陞武昌兵巡副使九月改本省督學乙酉春巡試湖南至常德會左闢交訐以督師檄招兵萬人使偏將楊國棟等分領之總督何騰蛟走長沙分大湖南北爲汛蔭錫晉湖北巡撫還常德先是李自成既死其義兒李錦等十八部屯澧州界上號三十萬遠近大震蔭錫欲撫之偵知錦母高氏有智術軍事皆取決而高氏弟高一功所部二萬人爲諸軍最乃集鎮將道府議親赴其軍李錦高一功以鐵騎數千來迎入營稱詔賜高氏命服賜李錦高一功蟒玉及金銀器犒其軍皆踴躍叩首謝軍中命酒蔭錫引卮論列教以臣忠子孝大義侃侃數千言明日高氏出拜謂其子李錦曰堵公天人也汝

不可負于是別部田見秀劉汝魁賀藍李來亨等來謁皆如約受撫焉事聞封高氏英淑夫人李錦左軍侯賜名赤心高一功右軍侯賜名必正其他部爵皆通侯號忠貞營加蔭錫總督侍郎賜劍并鳳紐銀印以寵之丙戌二月李高等率兵攻荊州凡旬有二日城且陷會大霧李赤心等蓐食帳中忽救兵數萬至飛矢如雨軍大潰蔭錫急召楊國棟張光翠等分駐澧州及回子河防禦明年三月永明王至武岡封蔭錫光化伯辭不拜五月大兵下湖南武岡破馬進忠王進才等俱走蔭錫亦入永定衛及永保諸土司中十二月朱容藩自稱監國招討副元帥建行臺於夔州蔭錫泝三峽至夔見容藩責以大義容藩懼自銷其副元帥印蔭錫還容藩後爲于大海所殺戊子春江西金聲桓反大兵自湖南回駐武昌蔭錫傳檄諸鎮俱出湖南四月馬進忠復常德王進才復桃源澧州石門各城皆下忠貞營亦克荊門宜城使來告捷諸潰兵皆會五月馬進忠兵戰於牛皮灘又大戰於麻河俱勝十月忠貞

營高必正等自夷陵渡江分道數萬人趣武陵馬進忠之師燒城走初蔭錫自夔還如忠貞營約以騎三千赴常德助戰竟不至馬進忠等既渡常德晉封公侯因并加李赤心等爲公李赤心請取長岳自效實欲避敵而南也馬進忠惡之至是高必正率輕騎數百突入常城出不意馬進忠佯設酒高會陰使人具舟渡老營東去日晡馬進忠擁騎數千披甲注矢出城走焚城中廬舍及瀕江船隻高必正輩亦怒請北還蔭錫恐有他變姑好語撫之馬進忠掠益陽諸縣而東忠貞營駐常德歲飢乏食議進取長沙乃以監車毛壽登總兵楊國棟守常德蔭錫自率標兵二萬人及忠貞營東攻長沙不克遂至湘潭與何騰蛟會未幾馬進忠亦至以前隙不和何騰蛟乃議留馬進忠兵攻長沙蔭錫率李赤心等援江右己丑正月大兵至湘潭馬進忠走何騰蛟死之蔭錫東發至攸縣南昌已破乃分遣堵正明尹具瞻將五千人守永興陸士毅守安仁龔龍守攸縣自率萬人及胡一清之師守衡州三月戰於

草橋兵敗走耒陽將趣永興軍而永興永安攸縣三鎮兵俱先潰堵正明陸

士毅等及隨師之待詔潘誓

一作哲

中書舍人邵履正等皆死之陸錫聞報走

彬州中途遇敵幾危者數矣當午忽大霧夜行有螢火數萬隨照之以故得

晝夜兼行達桂陽復爲楚鎮曹志建所困曹志建者鄞人封保昌伯有衆數

萬屯三湘之南界地險而僻得免蹂躪曹志建安之忠貞營兵敗過之大掠

曹志建恚甚謂故蔭錫所招降也并憾蔭錫迎入龍虎關阻隨行將士五百

餘人於關外一夜盡縛而殺之蔭錫寓佛寺中幾不得脫聞粵西明經何圖

復方結寨楚粵界上使人告以難何圖復率兵來迎因得走赴之間道至賀

縣何圖復後竟爲曹志建所殺六月蔭錫至肇慶召入閣三日加督師大學

士兼尙書賜白蠟五千錠使調李赤心等於藤鬱間率之出楚至梧州部下

叛去可三千人七月雲南總督楊畏知爲孫可望請封不得還過梧蔭錫疏

請封孫可望爲平僚王九月期李赤心等不至造其營詰之李赤心初敗於

柳州戰馬鎧仗盡失士卒疲困入粵未久無意北去欲蔭錫代請高雷二郡以休息士馬蔭錫不可數日盡拔而西散居南寧及賓橫之間蔭錫恚憾病作別部劉世俊劉國昌使人來告願自後出楚蔭錫悅親至潯迎之十一月劉世俊劉國昌果至遣東下梧以待并檄他鎮兵期以是月望日北發忽感寒疾革草遺疏自爲誄詞潯流湍急時舟居且夜半矣命從者解繫放舟曰吾荷國重任不能免胄赴鬪馬革裹尸今斃命臥榻死有餘恨固不若自沉於江葬魚腹中耳從者力諫乃止以是月二十六日卒贈鎮國公諡文襄後改諡忠肅子世明亦以是年夏先卒於軍

刊

行

瞿式耜粵西事

瞿式耜字起田號稼軒嘗熟人文懿公景淳孫也登萬曆丙辰科進士爲永豐令擢授給事中坐其師宗伯錢謙益事下詔獄事解累官僉都御史巡撫廣西江南旣破唐王立於閩廣西爲靖江封國舉兵爭立式耜密約總督丁魁楚總兵陳邦傅邀於蒼梧執之閩封丁魁楚平粵伯陳邦傅思恩伯式耜亦晉秩巡撫如故丙戌八月閩復破時何騰蛟在湖南兩粵山川無恙衆議立君咸以昭穆之序宜立桂乃共奉桂恭王之子永明王監國於肇慶式耜轉吏部侍郎掌部事內監王坤以司禮竊國柄舊臣呂大器李永茂方以智等咸以事引去式耜每事駁正不少屈焉十二月廣州破王坤挾王而走丁亥正月朔至梧州丁魁楚辭赴岑溪縣守險從官散失隨行惟式耜一人二月至桂林時肇慶俱破大兵先驅過平樂王坤請召武岡鎮劉承蔭入援因入楚式耜泣曰東藩已失所存惟桂林一隅若復委而去之武岡雖金城湯

池何能長久臣本起此以舉事願與此地俱存王乃以式耜爲吏兵兩部尙書總督軍務留守廣西封焦璉爲富川伯鎮桂加陳邦傳爲侯守昭平王竟赴武岡焦璉自全州回未三日而大兵亦至衝入文昌門城中大恐式耜督焦璉且戰且守自三月至五月曉夜立矢石中推食解衣與士卒同甘苦故人無變志劉承蔭援兵在城索餉而譁式耜括庫藏不足夫人邵氏捐簪珥以佐之旣而與焦客不和竟噪而去城幾破者數矣會陳邦彥等攻廣州大兵東回焦璉進復陽朔及平樂府陳邦傳亦由潯復梧州廣西再定式耜之力也秋八月武岡破王回次柳州長衡並失何騰蛟等俱至桂郝永忠盧鼎諸鎮兵雲集式耜籌畫糧糗日不暇給十一月王自象州回桂林式耜與新輔嚴起恒並典機務而馬吉翔以錦衣指揮與焉何騰蛟仍督師出全州戊子二月郝永忠之衆潰於靈川入桂林大掠王倉卒走南寧何騰蛟方犒兵永寧聞變馳回潰兵已飽掠避敵去式耜乃爲亂兵傷足臥何騰蛟至相持痛

哭招集散亾焦璉胡一清趙印選等兵尙數千人復入城守禦戰于城與甘棠坡巖關俱捷大兵遂渡而去詔賜式耜銀幣及精忠貫日四字金圖章一枚三月何騰蛟復全州不自爲功上疏歸功式耜閏三月李成棟反正於廣州具疏迎上江西金聲桓亦遣使齎奏至式耜疏請先幸桂林毋遽東下王不從竟幸肇慶己丑正月湘潭破何騰蛟不屈死之二月信豐破李成棟戰死南昌敗績復聞金聲桓王德仁並死王命式耜以太保留守督師兼督江楚各省兵馬三月堵蔭錫走道州永州失利式耜趣興寧侯胡一清還屯全州糧儲不繼王召廷臣議發東餉銀一萬兩庚寅正月南雄破寶豐伯羅成耀棄韶州不守王戒舟西上式耜再疏留王不從而駕抵梧州矣大兵薄全州胡一清退守榕江十一月五日嚴關破胡一清趙印選與寧遠伯王永祚俱以分餉入桂林榕江空壁武陵侯楊國棟寧武伯馬養麟率兵從小路軍榕江未戰而潰式耜催趙印選等速赴子營趙印選躊躇不前出城大掠胡

一清王永祚與綏寧伯蒲繆遂皆棄城而去城中大亂潰兵四掠式粗不能
禁撫膺頓足曰若此輩皆朝廷以高爵餌之百姓以膏血養之今遂如此鳥
獸解散乎適總督張同儼自靈川還聞式粗獨在城中入見曰事迫矣將奈
何式粗曰封疆之臣知有封疆封疆既失身將安往張同儼曰公以封疆爲
存亡同儼以公爲存亡也君恩師義同儼當共之矣式粗曰不然子亟圖生
以爲其難毋同死而爲其易張同儼曰古人耻獨爲君子公不忍我同死我
縱能有爲然豈忍公之獨死哉式粗家人泣請出城號召諸勳再圖恢復式
粗揮之與同儼飲達旦厥明被執見定南王孔有德二公皆挺立不屈孔有
德慰之曰吾在湖南已知有兩公久矣吾必不殺忠臣式粗曰城池已失不
可以言忠求速死耳夫復何言張同儼奮罵敵怒以木塞其口以刀背擊斷
兩臂命幽二公于別室式粗草遺表式粗賦詩同儼廣和至閏十一月十
七日遂同斬之式粗年六十有一是日冬至雷電大作雨如注山崩石隕桂

林人哀號載道式相有子元鋪從之死王聞痛悼贈粵國公諡文忠賜祭葬焉

附張同做字別山江陵人以廕爲錦衣衛同知永曆四年以詹事府詹事兵侍郎翰林院侍讀學士總督勦鎮恢勦兵馬便宜行事曾祖居正諡文忠祖敬修諡文烈叔祖克修諡忠烈同做死詔贈江陵伯諡文烈

刊

行

陳子壯粵東事

陳子壯南海人年二十二登萬曆己未科一甲第三名進士授翰林院編修
天啟中魏璫秉柄子壯父陳熙昌以給諫疏璫罪廷杖謫戍子壯亦以天啟
甲子浙江鄉試錄誹謗崇禎初起用累官至禮部侍郎糾唐藩不法時議
以宗室授文武官又力言不可忤旨下獄尋遣戍乙酉起江南禮部尙書復
忤時相馬士英罷歸江南破桂恭王方避亂寓梧州子壯發檄遠近言桂王
神宗子光宗弟宜立時唐王已立于閩廣督丁魁楚以子壯人望也集多官
議之子壯持前議益堅海道湯來賀讓子壯曰如公議閩立一君粵復立一
君內自爲敵蚌鷸卽無死誰爲之漁人者議遂寢後丁魁楚以擒靖江王功
封平粵伯湯來賀進江閩總督以人望亦召子壯入閣辭不行丙戌冬桂王
子由棖監國以子壯前議卽其家拜大學士太子太保兼兵部尙書節制江
廣閩楚軍務會唐王弟聿鏐至廣州自立子壯未果行十二月大兵克廣州

唐王死明年春大兵出廣西前兵部侍郎張家玉兵科給事中陳邦彥及新會王興高涼崔良楨潮陽賴其肖等前後聚衆攻克各州縣夏六月子壯起於南海之九江邨與陳邦彥約攻會城提督李成棟方東擊張家玉會城空虛故指揮楊可觀楊景暉及子壯壻前知州梁若衡等結花山降盜三千人謀陰召子壯期以七月七日兵至內外舉火應子壯喜甚先二日率水軍薄城謀者入郭被執事露楊可觀等皆死子壯兵駐五羊驛李成棟已破張家玉兵於新安趨歸擊敗之子壯奔還九江邨前御史麥而炫破高明迎子壯入居之十一月李成棟入高明子壯麥而炫與前知縣朱實蓮俱被執總督佟養甲寘於館厚享之獄具以犯旗示子壯曰不處公極刑則威不立遂衣以赭袴鼻之遊城內外遍更集諸降紳燕飲聚觀有奮足蹋子壯面大唾罵者臨刑舉酒屬諸紳曰畏否諸人以頭搶地曰敢不畏左右皆掩口笑子壯身被數十刀呼太祖高皇帝烈皇帝不絕口與麥而炫等同日死於市子陳

上圖亦在獲以家僮伯卿請寸斬以贖主人之孤得免死戊子春李成棟叛
子壯弟給事陳子升上書請卹得贈番禺侯謚文忠子上圖廕錦衣衛指揮
使

張家玉

張家玉號芷園東莞人中崇禎癸未科進士授翰林院庶吉士甲申闖賊破
京師家玉抵書罵賊賊縛之使兩武士夾之問以故家玉年少貌秀拔聲巨
詞辯賊歎曰吾殺此曹多矣臨死浙戰不能作一語未有若此人者竟釋不
殺家玉慮不得脫乃僞爲文譽賊乘間南走金陵會柄國者方借周鍾等案
以傾東林諸君子而家玉與周鍾同館又出周文忠公鳳翔之門益惡之竟
羅織削籍居錢塘與總兵鄭鴻逵副使蘇觀生等同護唐王至閩閩人立之
遂相蘇觀生以家玉爲侍講尋兼兵科監永勝伯鄭彩軍鄭彩軍駐邵武家
玉先驅抵廣信戰許灣頗捷遂解福州之圍丙戌正月被圍於新城力戰得

出加僉都御史開府廣信與鄭彩議不合自請回粵招募八月至鎮平諭山賊黃海如等降其衆數萬簡精銳萬人爲武興營餘散遣之遇大軍至赤山坂聞上杭敗信兵心已解兼餉盡潰回東莞居大父喪蘇觀生立唐王弟聿鐔于廣以兵部侍郎召家玉辭不拜十二月廣州破巡撫佟養甲素聞家玉名遣副使張元琳卽家召之家玉衣冠出見責張元琳以大義張元琳亦癸未榜與家玉同爲庶常者也歸報佟養甲復飛書諭之家玉答書有曰孔門高弟太祖孤臣如玉其人者安可以不賢之招招之乎生殺榮辱惟公命家玉旣義不肯屈其受業師林洙復力贊其起兵會蕉麗到澹二鄉以被掠與官兵相攻擊殺數百家玉與其渠何不凡莫子元等約以大舟來迎家玉出舊賜幢蓋麾葆鼓吹登舟襲東莞城入之執其新令籍降紳李覺斯等家以嚮士騰檄遠近所在嘯聚以應時丁亥三月十四日也十七日官軍至大戰於萬家租遂復東莞家玉走到澹總兵李成棟攻到澹三日破而屠之家

玉祖母陳氏母黎氏妹石寶俱赴水死妻彭氏被執不屈斷股體而死家玉走西鄉大豪陳文豹聚兵二千人保境奉家玉進克新安縣殺千餘人四月十日官軍攻西鄉不克而回家玉遣兵襲東莞戰於赤岡五月復自率兵攻東莞不克退回西鄉李成棟大軍至攻圍數日互有殺傷已而舟師敗家玉走夜經萬家祖視其家廟已燬祖墓發掘張氏族屠戮殆盡拜哭而去張氏爲唐殿中監張九臯之後宋末遷居東莞地倚大江面四百三十二峯先輩謂必生大忠孝人主持名教者十七傳而生家玉同邑李覺斯以家玉籍其家恨之刺骨倡爲厭勝之說燬廟發塚且踪跡張氏族屬所存輒指而戮之幾無噍類焉西鄉亦隨破陳文豹等俱見殺家玉至鐵岡得姚金之陳殺子等衆各千人遂走十五嶺復得羅同天劉龍李啟新等衆三千人先是家玉遣兵攻龍門縣陷之至是入龍門進攻博羅亦陷之并陷連平長寧兩城勢復振攻惠州三日不克克歸善縣還屯博羅官軍攻之家玉走回龍門募兵

旬日間得萬餘人家玉幼好擊劍任俠多結山澤之豪故所至翕然蹶而復起至是分其衆列龍虎犀象四營進攻增城入之十月李成棟至增城馬步萬餘家玉分兵爲三鼎足相救且倚深溪高崖以自固大戰十日力盡而敗李成棟圍之數重諸將請血戰潰圍出家玉曰矢盡礮裂欲戰無具將傷卒死欲戰無人天明俱受縛矣大丈夫立天常犯大難事至已壞烏用徘徊不決以頸血濺敵手哉因起徧拜諸將自投野塘中以死懷銀章一篆曰正大光明閩賜也時年三十有三官軍得其屍集諸紳殮視之李覺斯再拜賀曰是已某知其一齒缺以銀鑲之髮長可二尺三寸今果然死無疑矣蓋以爲快云然家玉父兆龍弟家珍仍爲人所匿覺斯不得踪跡也明年以思恩侯陳邦傳給事中李珍請家玉謚文烈父封增城侯少保大學士如家玉官家珍廕錦衣僉事其先後從家玉而死者爲師林海從弟有光有恒及鄧棟材韓如琰楊光遠等數十人粵中人又言家玉常乘一黃馬神駿趨捷每臨陣

風沙慘淡作勢怒鳴以鼓士氣及家玉死馬亦自躑死谿水側云

陳邦彥

陳邦彥字岩野順德人乙酉間以諸生走金陵上政要三十二策權奸沮不用唐王得其策讀而偉之至閩卽家授監紀推官而邦彥已登是科賢書以蘇觀生薦改兵部職方司主事監廣西狼兵至嶺聞變勸蘇觀生東保惠潮不聽會丁魁楚等已立永明王於肇慶蘇觀生前與丁魁楚不睦撤兵回至韶使邦彥赴肇稱賀且覬動靜也丁魁楚聞蘇觀生兵回恐見逼挾王西走梧州邦彥至桂太妃垂簾南面坐永明王西向坐丁魁楚侍勞苦邦彥卽改授兵科給事中令回慰蘇觀生召之入輔迨邦彥東歸而蘇觀生已迎立唐王弟聿錫於廣州邦彥不敢入貽書蘇觀生報命且勸其與丁魁楚并力勿國中自鬪貽漁人利也蘇觀生不能從竟搆兵於三水縣初戰廣兵敗再戰大同嶠廣兵以海舟詐降肇兵敗邦彥遂去隱高明山中未幾總兵李成棟

破廣州唐王弟聿錫蘇觀生皆死先是總督萬元吉使族人萬年募兵於粵得余龍等千餘人未行而贛州破余龍等無所歸聚甘竹灘爲盜殘兵依附者至二萬餘人肇慶總督朱治炯使監軍鄧研聰招之既至與督標兵不和譁而歸鄧研聰與萬年俱死於亂李成棟既定廣丁亥春進攻肇梧俱克之走朱治炯殺丁魁楚前驅至平樂府邦彥聞之扁舟入甘竹灘說余龍乘虛攻廣州余龍許之邦彥亦於高明山起兵與余龍由海道入珠江會城空虛巡撫佟養甲飛騎走桂林召李成棟回揚言便道徑取甘竹灘余龍等家屬所在遂退回于是陳子壯起九江張家玉起東莞霍師連等起花山皆圍聚徒衆與邦彥相應邦彥寄張家玉書云成不成天也敵不敵勢也方今王師風鶴桂林累卵得牽制毋西潯平之間庶可完葺是我致力于此而收功于彼也張家玉然之邦彥復遣其門人馬應房與余龍攻順德復之李成棟至順德余龍戰敗馬應房被執不屈赴水死馬應房卽前鶴慶守馬義祥子也

四月余龍再戰于黃連江亦敗死邦彥乃棄高明收餘衆數千人別徇江門下之前者攻廣州佟養甲得降人知其謀出於邦彥訪求其家所在急捕之獲其妾何氏并子陳和尹陳虞尹於肇慶厚待之爲書以招邦彥邦彥不復書但判其楮尾曰妾辱之子殺之身爲死臣義不私妻子也佟養甲壯其爲人仍善養其妾與二子後郡紳李星一舉人杜璜以兵攻肇慶始殺之杜璜等戰不勝亦死七月與陳子壯密約圍廣州陳子壯先至謀洩內應者遇害陳子壯欲引去適邦彥兵至因謂陳子壯曰李成棟方攻張侍郎家玉於新安聞省警必乘舟急還邦彥伏禺珠洲側伺其至以大舟從蘆葦中衝之公以大艦遮其西使不得去克城在此舉矣望青旗而朱旂者吾師也計定李成棟果以戰艦數百過禺珠洲勢甚盛邦彥少船少衝之頗焚其數舟李成棟引而西邦彥尾之會暮夜陳子壯不能辨旗色疑皆敵舟也陳動李成棟順風追之遂大敗邦彥欲回攻城城中已有備乃疾引兵攻下三水據胥江

與霍師連會前湖南黃公輔御史連成璧等亦攻下新會新寧八月清遠指
揮白常燦殺知縣何甲以迎邦彥因橫江樹柵絕嶺東餉道李成棟還師擊
清遠霍師連以舟師逼李成棟李成棟縱火燒師連舟兵亂破柵而入霍師
連戰死邦彥白常燦與太學生朱學熙嬰城守時民兵起者數千家惟邦傳
一軍最強常分出以救民兵之敗者至是精銳盡喪外無救者踰日城陷白
常燦死邦彥猶卒數十人操兵戰肩受三刃不死走朱氏園朱學熙已自縊
堂中邦彥哭拜畢素筆題其壁曰無拳無勇何餉何兵聯絡山海喋血會城
天命不祐禍患是撓千秋而下鑒此孤貞遂被執總督佟養甲使醫來視創
邦彥却之餽食亦不食在獄五日惟慷慨賦咏或投以紙輒隨而滿所傳有
大造兮多艱時哉不我與我后兮何之我躬兮良苦之句九月二十八日被
磔死監視者視其肝肝忽躍起擊監者面遂驚悸數日而死邦彥既敗張家
玉陳子壯亦隨沒逾年得贈兵部侍郎子陳恭尹能以詩文世其業

李元蔭

李元蔭者榆林人本姓賈爲李成棟養子因冒姓李成棟少時從高杰爲群盜以勇決聞及高杰封興平伯成棟掛鎮徐蔣軍印守徐州高杰爲許定國所殺成棟以徐州降會故趙王由棧與黃蜚起太湖成棟擒黃蜚走趙王授松江總兵從定入閩由漳州與巡撫佟養甲入惠潮時蘇觀生方擁立唐王弟聿鏗于廣州與肇慶兵戰於三水不復東顧成棟兵薄會城城中人猶以爲招來海上群盜遙呼之成棟兵免胄示以辮髮乃大驚謀守堞成棟兵奪門而入執唐王與周益遠諸王俱殺之蘇觀生自縊時丙戌十二月望日也明年丁亥正月成棟分兵取南韶親攻肇慶克之遣裨將楊大甫張月取高廉雷三府閩可義渡海取瓊州自率兵向廣西二十九日下梧州二月遣杜永和襲丁魁楚於岑溪殺之盡擄其賞以還進攻平樂先驅及桂林會粵東亂起會城被圍佟養甲遣人告急成棟遂東回往返攻擊自春徂秋始獲定

而西省之平梧以及海北高雷廉等城俱復失屢被責問明年戊子春江西

金聲桓王德仁反密書約成棟時佟養甲已授兩廣總督成棟雖晉秩例當

授總督節制自恃功高耻爲之下王德仁圍贛州急佟養甲趣成棟赴援成

棟與署布政使袁彭年等密議於三層樓既定語佟養甲曰今出城數十步

皆賊安能遠行計惟急改名號以安人心耳佟養甲愕然莫可誰何成棟遂

叛遣使赴南寧一時喜出望外封成棟爲惠國公晉佟養甲爲尙書襄平伯

佟養甲懼禍及盡以所部授成棟六月成棟使其將羅成耀以黃金千兩白

金十萬及綵紵舟楫迎永明王於南寧至肇慶拜成棟翊明大將軍以其子

元蔭爲錦衣都指揮掌絲綸房事擢袁彭年爲左都御史先是廣東都司馬

吉翔爲錦衣從永明王入武岡因內閣員缺得與票擬圖富貴者爭趨之其

在南寧陳邦傳駐兵潯江上下倚以爲重因以其子陳會禹爲錦衣比馬吉

翔而陳邦傳亦以復欽廉功加封思恩侯矣至是成棟封公陳邦傳意不滿

乃亦晉陳邦傳爲慶國公并封其中軍胡執恭爲武康伯成棟聞之亦爲其
下杜永和閻可義郝尙久羅成耀黃應杰楊大福張道源等七人請封皆得
伯爵而元蔭亦得錦衣侍衛比陳會禹焉元蔭修整大雅喜與士大夫交袁
彭年素負時望掌臺綱于是劉湘客丁時魁金堡蒙正發等皆與之善持論
侃侃專以尊主權別流品斥佞授爲事遠近悉望而畏之因有五虎之目五
虎者袁虎頭劉虎皮丁虎爪金虎牙蒙虎矢也冬十月成棟攻贛州不克時
大兵已至南昌金聲桓召王德仁還救贛州守禦已固成棟至總兵高進庫
擊敗之退避南康縣十一月佟養甲間使以聞殺之己丑正月南昌破金聲
桓王德仁俱死二月成棟兵敗於信豐自斷後披甲渡河馬蹶沉水死贈寧
夏王諡武烈五月以杜永和爲總督守廣州閻可義守南韶未幾死以羅成
耀代之加元蔭車騎將軍封南陽伯領兵宿衛六月楊大福爲亂於梧州元
蔭召至縊殺之庚寅正月朔平南王尙可喜嗣靖南王耿繼茂至南雄羅成

耀自韶州潰歸十四日韶州破永明王西走梧州元蔭與馬吉翔等守慶羅成耀走高州爲亂元蔭以計殺之人情恃以少安初成棟父子方寵陳邦傳居西屢爲金堡等所排積怨刺骨會其下徐彪亦叛之忠貞營李赤心等又自湖南潰入粵散處賓橫之間陳邦傳不能制威望日損東事急召之赴援非其意也顧欲藉以洩前憤將至梧群情洶洶適西撫缺衆議推劉湘客兵部侍郎程源論其比黨金堡等四人皆杖戍惟袁彭年先以憂去得免焉陳邦傳抵三水竟觀望不敢進大兵薄會城杜永和等與元蔭弟李建捷力戰禦之杜永和等進爲侯李建捷封安肅伯廣州城三面臨水成棟在時復命築兩翼傳於江外爲砲臺水遠之地險守固攻圍十閱月不能破偏將范承恩謀內應決砲臺之水大兵藉薪徑渡遂得砲返以內攻十二月二日城破屠之范承恩降杜永和等由海道奔瓊州元蔭弟李建捷奪圍至肇慶陳邦傳等師俱潰於三水隨聞桂林亦破梧州君臣夜走陳邦傳遣兵邀劫

各官於藤江明年春元蔭在肇慶其下亦多謀爲變者不得已與弟李建捷俱奔南寧伏地痛哭哀動左右會孫可望遣賀九義等將兵至殺內閣嚴起恒等元蔭忿甚請出靈山收高雷之兵迎王入海至欽州之防城爲土兵王勝堂所執送靖南王不屈左右挺下元蔭笑曰鼎鑊不懼何有於挺又令作書招杜永和元蔭笑曰杜將軍繕兵窮海差有丈夫氣乃招之耶王義之使其故人往說之曰將軍昔未受國恩耶元蔭大慟曰某昔不過帥府一親人耳今爵通侯司禁旅狼狽被擒計惟一死報國豫讓不言之在前乎吾父俟于九泉久矣故人曰李果將軍父耶元蔭曰岐陽黔國俱以養子自奮子母多言遂與弟李建捷及前鋒將李用朝俱被害投屍海中明年壬辰瓊州破杜永和等俱降

刊

行

王祥川貴事

王祥綦江人崇禎末爲九圍子隘官素號勇悍張獻忠陷四川惟遵義一府未附大學士王應熊回自京師縞素誓師即遵義置幕府滇人馬乾行巡撫事與監司劉麟長王芝瑞等傳檄討賊呂紳刁化神以鬼道募兵甚夥王應熊使涪將曾英襲取之曾英聞人與部下涇陽李占春項城于大海等俱以材武稱遂收復重慶屢破張獻忠兵祥亦出師綦江與相犄角祥威望不及曾英而幕府委任過之丙戌十一月既望大兵至西充誅張獻忠孫可望等南奔過重慶擊曾英殺之是月抵綦江明年丁亥正月由遵義入黔祥等走永寧山中大兵下蜀巡撫馬乾先于內江被難王芝瑞劉長麟皆從間道歸王應熊卒于永寧之畢節衛祥于永寧赤水間招集潰兵與賊之散亾者聚至數萬人進攻遵義復之曾英既沒李占春于大海收殘卒屯涪降賊袁韜爲大兵擊敗由順慶南下李占春等避之東走夔州將赴荆歸命會宗室朱

容藩自肇慶奉令入蜀取道施州衛湖江西上遇李占春于大海說之復西時大兵陸行新鎮盧光祖以舟師泊湖灘所得皆曾英舊兵不意李占春等猝至戰不利大兵北還順慶李占春乘勝至涪結營州屬之平西壩三面阻水號爲將營于大海屯忠州花陵河總督李乾德亦以袁韜武大定兵還闖入佛圖關據重慶而祥據有遵義各屬邑并重慶屬之綦江內川遵義故播州地饒沃而深阻蜀紳士避亂者多歸之戶口充實祥以是獨雄於諸鎮中以御史錢邦苞言封祥爲平寇伯平寇前曾英封號也祥復得之一時以爲榮李于等勿服也適袁韜與李占春爭長相攻祥惡李占春之強思與袁韜合一日誘李占春計事伏兵執之李占春殺守者逃歸以是諸鎮不和日尋干戈公鬪怯而私鬪勇不足與有爲也武岡之變相傳永明王已被執宗室朱容藩在夔州自稱楚世子監國招討副元帥諸將皆賀李乾德惡之未幾故相呂大器自黔抵遵義祥具橐鞬郊迎事之甚謹楚世子藩容聞呂大器

至亦使人以千金來遊呂大器北行先過李占春營具言永明王無恙容藩乘機僭竊當得罪不宜輒受其爵號李占春以爲然遂不復事容藩總督李乾德亦傳檄聲容藩罪容藩益窘乃北依三潭口兵攻石砭司李占春救之容藩兵敗走忠州爲追兵所殺李德乾與袁韜武大定等俱西赴犍爲與楊展合呂大器偏歷諸鎮太息謂李乾德曰楊展志大而踈袁武忍而好殺祥亦庸懦而不足仗蜀事其尙可爲乎遂回黔至獨山州疽發背而卒而祥又與黔鎮皮熊構隙皮熊者初名羅聯芳守黔以巡撫范鏞荐授總兵官孫可望由遵義赴黔破皮熊兵於烏江皮熊走平溪孫可望入滇皮熊自平越守兵復黔破土賊藍二等以功封定番伯遵義飢祥赴黔告籙皮熊以爲詞己虛實也阻之部下因而截奪其賞祥怒舉兵圍黔省三日敗而還皮熊因陳祥越境相侵之罪請約諸鎮會討諸鎮久垂涎遵義各率兵攻祥大小十餘戰不能克而去惟黔兵連勝深入相持月餘黔兵乏食皮熊子皮文英爲兵

主不能撫循其下氣益衰戰敗皮文英引軍走祥悉銳乘之黔兵大潰爭渡溺死者三萬餘人祥亦上疏自理復使使和解之會盟於烏江罷兵修好于思南銅仁湄潭各郡邑皆歸于祥蜀縉紳程源梁應奇辜延泰等先後赴肇慶皆言祥威武可大用乃封祥爲忠國公皮熊亦封爲匡國公蓋並藉爲西藩障滇寇也已丑冬孫可望由滇赴黔皮熊不能禦走清浪衛孫可望使白文選追執之釋不殺復使使與祥約盟或曰孫可望以好來會當許之不聽孫可望怒使文選白將三千人赴永寧守將侯天錫迎白文選詐以危言報祥曰滇兵二十萬已遊烏江期會師夾擊矣祥懼召諸將與謀將軍李定者最驍勇衆服之李定曰二三年來日操刀同室雖捷亦耻今發兵拒孫可望勝則窺西南不幸而敗不失爲忠義之鬼他何所云祥猶豫不決私計自眞安州入隆武之間據隘守要引李占春于大海爲唇齒乃裹其文繡珠玉金寶之屬作竹夾三千背使牙將負之先行衆心盡解多送款孫可望孫可

望疾發兵掩擊之祥倉卒夜走牙將已先劫其賞去比曉失妻子從者僅百餘騎追者至馬蹶不能行祥率死士數十人短刀突戰殺百十餘人創重自刎死明年庚寅孫可望將盧名臣下涪州李占春戰敗於野豬寺口與于大海俱順流下楚降皮熊居黔中其壻張默爲水西宣慰安坤師至壬寅年有常金印者自稱開平王之後至水西與坤謀叛王師擊滅之並執皮熊翁壻時皮熊年已八十餘矣抗節大罵遂絕食飲四十日而後死一時哀之

楊展

楊展字 蜀中嘉定州人中崇禎辛未科武進士爲四川總鎮中軍張獻忠破成都展被執逆脫其縛入江中泅水而下至嘉定張獻忠定蜀陞嘉定州爲府旣而曾英等兵起展亦乘間入犍爲殺僞令以起事州人開門納之張獻忠旣誅餘賊散走時蜀地殘破已甚歲復饑大兵北還諸舊將稍稍收復保就以捷書報肇慶遙受爵號嘉定近省而險展復善於撫衆遺民及賊

之潰散者相率歸展有衆至數萬人先是張獻忠之去成都也輦金銀沉諸江有知其處者展使壯士乘巨筏探求之數月獲大鏹以巨萬計民間飢饉癘疫相仍斗米價至三十金飢孳載道或父子相烹食乃遣使百輩赴黔楚告糴前後入米數十馬石自鄉先生以下及弟子員俱贍資與朝夕居處農民給牛種口米使擇田而耕壯而願戎事者補伍月予銀米使操兵戰百工雜流各以其執就食孤寡無居者廩之于是巴蜀子遺賴以全活者甚衆是年秋大稔_展遂雄視全川矣川人走四方者述_展慈愛莫不流涕戊子對華陽伯得錫予視他鎮有加旌之也_展既地廣兵衆然性矜尙文墨不矜攻戰取舍任情至引賊自助卒爲袁_輜武大定所殺袁_輜張獻忠之別部也有罪當斬帥所部數百人走後聚衆益多號姚黃十三家賊所過焚殺與獻賊等督師王應熊招降之請授副將使守順慶武大定爲渠賊小紅狼之別部以材武見稱降于總督孫傳庭傳庭敗死武大定聚衆南山中大兵至戰敗走

興安踰廣元與袁韜合衆數萬人謀突秦而西官兵擊之大敗喪失婦女韜重幾盡乃收餘衆萬人棄順慶而東過涪入山由武彰以趨黔之婺川既而李占春等復涪袁韜等亦返鬪至佛圖關與李占春會於重慶爭長不和巡撫李乾德奉命督餉四川在袁武軍中李乾德素善占驗夜觀星象與袁韜言宜有急兵是夜李占春果襲之有備不能克據李占春家口而去次日復還之袁韜等既與李占春搆隙且重慶兵多食少李占春乃遣人說展與合兵展大喜與袁韜武大定約爲兄弟居之榷爲供億資裝日相望于道久之展復與李占春通問袁韜武大定請丐無已展不能悉應遂有隙李乾德屢諷展經營川北韜不能聽李乾德度展終不可與有爲而謂袁韜武大定輩驍勇足資也袁武輩亦曲意事李乾德遂與謀殺展而併其衆會袁韜生辰展具舟親以牛酒資幣致祝并犒其師袁武治酒高會展以甲士五百人長刀自衛入夜犒從者酒五百人皆醉遂坐上擒展囚之別室尋殺之發兵圍

嘉定諸將奉展妻及子楊景新誓死以守久之城中飢人漸有異志王祥曹
勛李占春等發兵救嘉定者皆敗去于是內應者以城降展妻自縊楊景新
北走而展士馬財賦盡歸於袁韜武大定矣衆論俱不直李乾德宜賓樊一
衛貽書誚讓之事聞切責李乾德問展死狀他鎮俱上書請會師致討會粵
東湖南喪師事良已庚寅孫可望據黔將圖蜀乃爲展訟冤聲李乾德及袁
韜等罪惡遣其將王自奇等將兵三萬由川南進別遣劉文秀精甲萬人由
滇渡金沙江踰大小象嶺過大渡河出黎州取曹勛以襲其後而袁武不知
也方悉力拒王自奇于川南月餘劉文秀由黎雅趨嘉定袁武撤師還救王
自奇尾擊之袁武之師大敗舉就擒李乾德自沉於水死

楊畏知滇事

楊畏知字介甫鳳翔府寶鷄人舉陝西鄉試第一名崇禎庚辰以保舉特用歷官雲南副使分巡金滄道乙酉秋武定土司吾必奎作亂連陷祿豐廣通等縣進攻楚雄府破之畏知監軍復楚郡郡人請留畏知強壓遂由大理移駐焉時阿迷土司沙定洲奉調會勦至省而吾必奎已擒沙定洲以十二月朔入黔國府爲亂巡撫吳兆元不能討且許爲請代鎮黔國公沐天波走楚雄畏知納之沙定洲率衆西追畏知與沐天波計曰郡城新破瘡痍未復賊以方張之銳來攻必見陷同死無益公不如走永昌據重江之險比賊越楚而西踟躕於大理蒙化間需數月而後定吾守禦旣備傳檄四出賊欲趨永則恐吾斷其歸路欲返攻則公隨之首尾夾擊撲滅可期也沐天波遂走永昌明年春沙定洲至城下門已閉畏知從城上語之曰若所急黔國公耳今已西矣待若定永昌回此時朝命已下當以鎮道禮相見今順逆未分吾不

能爲不義屈也且若不憂迤西諸司受黔國檄而合從見討乎沙定洲恐失
沐天波遂與畏知盟而去分遣其黨王翊李日芳等攻大理蒙化屠之畏知
乘間檄郭外居者盡入城清四野築陸障檄調漢土官兵姚景各郡俱響應
沙定洲聞之不敢至永昌而回攻楚雄畏知守具既集屢攻不能下一日畏
知坐城樓賊發巨礮擊樓烟燄所指正罨畏知賊相慶謂必死須臾烟散則
畏知端坐無恙惟進賢冠失左翹耳因驚歎以爲有神助畏知視賊懈輒出
奇兵奮擊所殺傷甚夥至夏始引去先是沙定洲變起倉卒諸土司以撫軍
故觀望未敢動及聞畏知倡義于是寧州祿永命石屏龍在田嶠峨王充猷
等皆聚衆不與通沙定洲恐阿迷有失東還攻石屏龍在田走破寧州殺祿
永命至嶠峨王克猷逃死於路迤東既定乃復還攻楚雄分兵爲七十二營
每七營各爲一大營統之環城濬濠爲久困計畏知守禦益堅逾年不能拔
丁亥春孫可望等至雲南沙定洲解圍還戰大敗遁歸阿迷孫可望入會城

巡按御史羅國瓚宗室朱壽琳死之先是唐王在閩聞畏知拒賊事已晉都御史督滇師孫可望等亦聞其名既入滇分遣李定國東追沙定洲而已與劉文秀俱西出畏知率兵至祿豐之啓明橋拒戰不勝赴水淺不死踞而罵孫可望下馬慰之曰聞公名久矣吾來爲雲南討賊公能共事當相與扶明室非有他也畏知瞪目視之曰賊給我耳孫可望曰不信當與折矢誓畏知曰果爾當從吾三事一不得仍用僞西年號二不得殺吾民三不得焚廬舍掠婦女孫可望皆許諾乃與同回楚雄西畧大理各郡使劉文秀至永昌以沐天波歸迤西八府皆得免屠戮爲畏知也既回省臨安任僕倡議尊孫可望爲國主此時閩已破兩粵亦被兵音問阻絕乃以千支紀年鑄與朝通寶錢畏知忿甚顧念己因之陡死無益惟日稱道忠義以動其下有所忤輒鼓掌謾罵賊怒多欲殺之有知之者以爲此忠臣也李定國劉文秀尤愛之孫可望與李劉輩本儕伍一旦自尊大若無以相服每事多扞格因時憶畏知

言且聞肇慶已有君李錦李成棟等皆受爵號私計倘假我王封可以制同類惟吾所欲爲矣畏知又朝夕述前約已丑始定議遣畏知同永昌龔彝赴肇慶過黔爲皮熊所阻久之始得假道至粵進孫可望表請王封兵科金堡首言本朝異姓止有贈王三百年定制不宜壞自今日衆皆以爲然畏知曰不與無益彼固已自王也一旦降號公侯而能欣然受命者此純臣之節寧可望於若輩若因其向義破格明恩猶幸收用於萬一旦法有因革今時異勢殊土宇非故猶必執舊法耶議數月不決臨發乃賜一字親王章而無封號畏知西過梧遇堵蔭錫曰孫可望業自王雲南今賜之印而無國名是猶斬之也激猛虎而使噬人奈何堵蔭錫然之爲補牘入始封孫可望爲平遼王加畏知爲尙書龔彝爲侍郎而行武康伯胡執恭者故陳邦傳中軍駐防思恩城地與滇近聞孫可望欲求封先使人以書通約許封爲秦王孫可望悅胡執恭謂奇貨可居卽具疏報聞且謂機不容遲臣已便宜鑄印填空勅

賈行矣胡執恭至滇孫可望郊迎甚恭所部額手交賀儼然以秦王臨其下矣比畏知回而始知其詐顧深耻之曰爲帝爲王我所自致何藉於彼而屑屑更易徒爲人笑歟仍厚待胡執恭屏畏知所賈印篆不用也庚寅春粵東告警自肇慶遷於梧孫可望使至因復議滇封內閣嚴起恒持不可兵侍郎楊鼎和助之且以爲不臣其人則不受其貢并所進白金玉帶等物俱却之孫可望怨益深秋九月自率兵至黔去粵益近十一月東西兩會城並失烽火逼南寧西竄無地更使劉蕙封孫可望爲冀王孫可望仍不受畏知曰秦冀等耳顧假何如真孫可望終不聽畏知私念勢迫矣主憂臣辱吾無所逃罪李定國等亦咸勸孫可望趣畏知行以始終之畏知行未至孫可望先遣賀九義張勝張明志將兵赴南寧求阻秦封者而甘心焉楊鼎和嚴起恒等俱被害南寧鼎沸始真封孫可望爲秦王畏知至痛哭自劾語多侵孫可望遂留南寧孫可望聞之益怒使人挾之回黔畏知見孫可望大罵曰賊終不

可與爲善我乃爲賊所誤負不義名於天下死有餘責除頭上積擊其面孫可望怒命殺之畏知爲人忠義激烈每陳說順逆輒傾其坐人與孫可望相從久心諒其無他雖出一時之怒猶意左右必有救者然賊令嚴每怒咸屏惕莫敢出聲久之乃自令勿殺則已無及矣平時戮人地距營門可十里許時尙未至顧畏知行數步輒坐不去曰此卽吾死處行何爲故途未半而被害孫可望深悔之復杖其左右之不言并行刑者畏知雖死而李定國奉永明王至滇閱二年始亾國人猶以爲畏知所啓云畏知贈少保謚文烈楚雄人至今祠祀之

沐天波

沐天波黔寧昭靖王莫十一世孫也崇禎三年父啟元卒天波襲封黔國公掛征南將軍印代鎮雲南末年蜀亂叅將李大贊守武定李大贊貪墨數以事侵土司吾必奎吾必奎遂反調各土司兵征之沙定洲者安南土司沙源

之子娶阿迷普名聲妻萬氏兼有兩家之衆素懷不軌乙酉十一月奉調至省吾必奎已先誅沙定洲留省不去都司阮韻嘉叅將袁士弘張國用等皆與之私黔國公鎮滇久家饒裕滇人于錫朋饒希之遊天波門下多所逋負被遣每見沙定洲輒誇沐氏金寶以動其心遂以臘月朔入天波第蜂擁焚掠天波從小竄出走西城母陳氏妻焦氏走城北普吉邨曰吾輩皆命婦不可爲賊污全家舉火自焚死寧州土知州祿永命亦奉調在省方率兵與沙定洲巷戰阮韻嘉等謁巡撫吳兆元請發檄止兵撫定焉天波望救不得遂由楚雄西奔永昌沙定洲追之至下關楊畏知據楚雄傳檄討賊沙定洲乃回前者流寇初起石屏土官龍在田與副將許秉淳皆奉命援楚隸總理熊文燦麾下張獻忠在穀城孫可望等趨幕府與龍在田許秉淳相識迨張獻忠敗孫可望等走黔龍在田許秉淳在石屏爲沙定洲所攻亦西走使人間道赴黔迎孫可望告以滇亂曰假大義來討全省可定也孫可望等乃詐稱

黔國公夫人弟焦侯請兵復仇滇人受沐氏世恩憐天波無罪見攻聞之惟恐其兵來不速也及至始知爲孫可望等殊失望監軍楊畏知禦之兵敗被執復說以反正乃稱爲黔國復仇如初且以書告天波天波使其子沐忠顯報之孫可望使劉文秀同至永昌以天波回省明年李定國至阿迷執沙定洲及萬氏歸磔之天波具衣冠謝復家世之仇孫可望等以勳舊禮待之亦不復假以事任也丁酉李定國自兩廣敗歸過安隆奉永明王至雲南天波以世臣受寄心管其冬孫可望內犯使其將張勝間道襲會城時李定國等俱出禦唯王尙禮在城與張勝通謀爲內應天波覺之誘之同入朝以護衛兵守之天波素善流星鎚經亂每携袖中是日恐左右有變出鎚舞縱橫擲擊觀者皆披靡王尙禮俯首歎曰吾已爲檻中虎不復煩公攘臂也旣而李定國奮力破走孫可望擒張勝凱歸論功白文選馬惟興馬寶等皆進爵次及天波辭曰吾世受國恩常慮無以報寧敢望新秩乎蓋久知國事已去自

分以身殉使其子分贅各土司曰庶存先人之祀于萬一先是沙曾之變陳
焦兩夫人俱自焚惟侍女夏氏歸其母家得免兩經變亂義不辱荆髮爲尼
比天波回念其節遂使掌家政亦不復娶己亥春大兵至滇天波并棄夏氏
獨身從入緬夏氏自縊兵亂死者相撐拄爲鴉犬所餐血肉狼藉而夏氏屍
棄十餘日無敢近者事平得收葬咸以爲節義所感云天波既行以二月二
十六日抵曩本河緬人守關使天波先入宣諭緬兵聞黔國公來猶下馬羅
拜蓋其世德入人久矣晦日至蠻漠天波與國舅王惟恭典璽監李崇貴謀
曰主上入緬我輩宜奉少主進茶山可調度諸營卽在內亦藉以爲重使緬
人有所憚王惟恭入言之王妃不可遂止三月二日緬酋以四舟來迎從行
文武官別走陸道者九百餘人馬稱是於是從行者甚少十八日至井互二
十四日緬酋使人傳語述萬曆時事并出神宗璽書合今篆差一分以爲僞
天波出已印比之無差乃服蓋緬自萬曆時已絕職貢構兵故也居井互月

餘天波與蒲繆王啟隆集樹下議緬待我情日薄後事未可知不若及今走尸臘二撤出孟養以圖生計爲馬吉翔所阻計復不行及白文選等兵至亦爲馬吉翔差官所却五月遷赭硜誅芽以居八月緬酋使人請天波入見蓋蠻俗以八月十五日爲歲節屬國皆來朝欲天波至以誇示外蠻也天波不肯行強遣之既回慟哭告從官曰前在井互不聽吾言以至有今日之辱我不屈身則主上已在虎穴何以保全嗚呼誰使我至此耶明年庚子秋七月緬又來請天波辭緬使曰此行不似前當以客禮見至則果如所言乃因李定國等兵又至而僞爲恭敬耳辛丑正月緬酋以老避位其弟莽猛白代立索賀禮七月使誘從行者過河議事及至以二十人執一人無得脫者惟天波出袖中鎗擊殺十餘人而死是時同死者馬吉翔以下四十有二人而其先以病卒與婦女驚竄自縊者不計從行之文武于斯盡矣天波三子其二先病卒獨忠獻在石屏隨其婦翁龍世榮出降居雲南無恙是年四月有梅

道人者與張琦尹士鏞等謀逆僞爲忠顯書致寧州祿昌賢事發張琦伏誅忠顯不免謂其妻龍氏曰吾且陷不測汝娠已四閱月脫生子可無絕先人後乃令內官滕九德僕白君愛引之出詐言進香東岳祠遂浮舟至昆陽州忠顯逮入京卽以婢夏蓮爲龍氏真龍氏乃在昆陽州居六日後走匿新興滕飛熊滕飛蛟兄弟家八月產一男名爲神保乙巳三月新興土酋王耀祖等謀逆聞神保在作檄移諸蠻以衣幣迎龍氏母子入山期事成立以爲主數日戰不利遷之法冲白乃家又令白君愛別藏神保於滕氏六月俱捕獲之解京忠顯先在京尙無恙至是并逮訊焉嗚呼沐氏雖不血食觀其舉家殉國可不愧稱世臣矣

李定國

李定國者陝西延安人與孫可望劉文秀艾能奇俱少從張獻忠爲賊張獻忠兒畜之因冒張氏張獻忠僭號於蜀置平東撫南安西定北四將軍而定

國以安西爲號獻賊死孫可望等至重慶殺曾英南走綦江衆無主欲散始相與尊孫可望受約束丁亥正月陷貴州三月入雲南定國孫可望分兵畧定迤東西回省在籍御史任僕倡議稱孫可望爲國主設六卿鑄輿朝通寶錢以干支紀年孫可望欣然欲帝制自爲矣群賊本起等夷以一時無主權相統屬非心服也定國尤崛強每事相抵牾孫可望怒因他事執定國于滇武場杖之百旣復起持定國而哭曰吾以大義辱吾弟願弟改心與共濟大業勿相戕也定國再拜謝請自擒沙定洲以贖罪由是心恨孫可望已丑楊畏知說孫可望歸肇慶請王封胡執恭自思恩入滇矯封孫可望爲秦王孫可望始奉正朔會肇慶敗永明王走南寧孫可望以秦封非眞歸怨執政使賀九義賊殺嚴起恒楊鼎和等于南寧迎永明王置之安隆所以兵守之凌逼百端無復人臣禮相傳其疏辭云人或謂臣欲挾天子令諸侯不知彼時尙有諸侯諸侯亦尙知有天子今天子已不能自令臣更挾天子之令以令

于何地令于何人其放縱無君類如此庚寅定國受封爲西寧王東攻靖州
江崗皆克之遂陷廣西敗定南王孔有德執陳邦傅等北取永州衡州楚粵
間歸附者日衆不復受孫可望約束孫可望怒自至沅州使人邀與計事將
殺之定國率兵圍廣西永明王使使封定國爲晉王召之入衛定國感激誓
以身報孫可望聞之益怒殺安隆與謀者吳貞毓等一十八人定國愈恨孫
可望丙申十二月定國敗於新會馳回安隆奉永明王入滇劉文秀納之明
年秋孫可望自黔舉兵內向其下白文選馬寶馬惟興等皆叛之歸定國孫
可望遂敗走長沙歸經畧洪承疇軍前降之于是定國與蜀王劉文秀並居
雲南而事權專歸定國定國于四將軍中與艾能奇並以勇猛稱而艾先死
楚粵之役連陷十數城殺兩王子其黨益嚴憚定國定國性伉直與人無私
回滇矯孫可望之失事永明王盡禮進奉極豐不以威凌士類人以此多之
然計慮籌畫不能及孫可望既柄國記室金維新者滇人也官少宰爲定國

所信任群小爭趨之舊人失職多怨望于是王自奇等俱叛誅戮頻行勢亦

漸衰矣戊戌劉文秀亦死矣大兵三路入雲南定國拒戰於安隆之涼水井

等處敗歸遂西走永昌永明王入緬甸定國伏兵于磨盤山

原名高黎貢山

大戰不

勝走至銅壁關結營招集散失士馬使高元明先行馳報永明爲緬人所殺

不得達定國率衆駐孟定土府聞白文選在木邦移兵南島與之會先是定

國敗于安隆白文選在七星關亦潰歸留大理之玉龍關斷後追兵至白文

選在沙木和出右甸鎮康不與磨盤山之戰定國見之頗以相尤白文選不

悅及議所向定國曰我兵入緬緬苦供饋必相拒於境擊之禍結恐釀不測

不如擇近邊險要地暫息士馬益招集散亾兩人相爲犄角緬外憚吾兩人

在內者可無恐且得覘雲南動靜結連諸土司爲後圖白文選曰兩人俱在

外則在內者危不如我入緬護衛在外事王自任之白文選竟帥所部由錫

泊磨整入緬定國知白文選不與同心亦移屯猛緬數月兵稍集沅江土司

那崙與降將朱養恩許名臣高應鳳等謀應之事露守雲南者率師圍元江定國方與孟艮構兵不能救那崙等俱誅死賀九義自南寧間道奔至孟艮妻子在雲南守者使其妻作血書付家人李啟雲至孟艮招九義賀九義受之不以告定國定國勢已敗見其黨多降益懷猜忌金維新等皆杖死有以賀九義事告者因伏甲召賀九義飲執而杖殺之散其兵兵皆怨神將何起龍率之走至蔓谷阿入滇降白文選抵擁會江使人諭緬皆被殺因渡江擊之大敗緬衆緬使人僞約許移城給之陰召兵兵既集以巨礮擊白文選營白文選不能支且糧匱乃回見定國于孟艮定國曰曩不用吾言今仇怨已結在彼者危矣庚子九月八日與白文選俱發自孟艮分道入緬定國由右白文選由左期以冬會於洞武追乏糧士馬死亾相續十月中定國至洞武見沿江多船議欲分兵乘船渡江赴赭硯迎永明王自率兵攻阿瓦以制緬使母來爭其下靳統武曰分兵力單不如全力攻緬緬破自送還吾主矣乃

俱望阿瓦而進遇緬兵於瑞羊岳擊敗之緬城三面阻江惟一面通陸自白

文選還後併鑿之引水爲湖畱隄三匝置木城其上定國抵南嚙喇江爲浮

橋以濟使人諭緬出王卽回兵緬酋不聽乃進屯洞怕離緬城八十里白文

選屯象隄離緬城八十里緬城於木城之外更立木城出兵守之明日木城

兵復前另立木城以守城內復出兵守舊木城步步而前漸與定國營相近

乃大出兵與定國戰前隊皆象定國戰不利趨白文選赴援合力死戰大敗

緬兵天炎士渴不能追緬仍入城以守定國獲緬目不殺善待之諭令還王

終不聽謀渡江向赭磴前洞武船皆已藏匿使其下赴馬得狼井角造船其

下自相攻殺出降復使人守江橋亦皆焚橋走定國計益窮五月緬酋弟弒

其兄自立盡殺從行文武官馬吉翔等四十有二人定國以十六舟渡江擊

緬不勝覆其五舟八月十八日與白文選俱引還洞武五日至黑門坎白文

選軍在後其下勸之分道出雲南且以賀九義事動之白文選遂引而北定

國覺使其子李嗣興隨白文選以觀去向白文選部下勒兵回向嗣興嗣興怒亦勒兵迎之定國遽使召嗣興還曰吾弟兄數十人今惟存若與吾耳何忍更相戕吾前所以使爾隨之者冀其悔而復回仍與吾併力也既勒兵相向念已絕矣任彼所之我自盡吾事可耳遂率所部東向九龍江而進白文選北行遇吳三桂畱屯錫泊大兵至復走茶山馬寶等追及之遂出降而緬酋竟獻永明王于平西王吳三桂軍前定國在九龍江聞報東走景線壬寅五月至猛臘士馬死亾日衆定國乃置蘸自述平生所爲如天命已絕願速死毋徒苦衆人未幾雲南四月二十五上崩之信亦至定國遂病以六月二十七卒于軍八月子嗣興自慢怯降與劉文秀子劉震艾能奇子艾承業俱入京受世職孫可望死其子孫某襲王封一代後亦降爲公

刊

行

大臨始末

庚寅永曆四年冬十一月初五日桂林破初十日警傳梧州行在震動上登舟夜發陳邦博從清遠遄歸謀劫駕不得邀鹵簿舟之在後者并殺從官董英許鳳潘駿觀等於藤江十六日上幸潯州二十八日駐蹕南寧五年辛卯二月孫可望遣其將賀九義朱養恩張勝張明志等入衛實欲賊殺阻秦封者內閣嚴起恒侍郎楊鼎和并劉堯珍吳霖張載述等咸遇害至此始真封孫可望爲秦王先是順治丙戌歲肅王襲殺流寇張獻忠於鹽亭其養子平東將軍孫可望安西將軍李定國撫南將軍劉文秀定北將軍艾能奇都督白文選馮雙禮等率潰兵奔重慶江平蜀侯曾英戰死丁亥春由遵義取貴州聞沙定洲之叛孫可望僞稱與黔國公復仇統衆疾趨雲南沙定洲者臨安蒙自土司也父沙源崇禎年與阿迷土司普名聲應調同征水西普名聲妻卽沙源之女無子娶江右賈人萬氏女爲嬖妾生子普祚遠已而普名聲

子祚遠俱死沙定洲乃妻萬氏遂兼有二土司之衆兵勢轉強乙酉秋武定

土司吾必奎叛奉調會勦至則吾必奎已就擒沙定洲留省不去心曠黔國

私通其家奴阮韵嘉徐中和叅將張國用都司袁士弘等密謀內應以臘月

朔日擁衆焚掠黔國公府第沐天波懷印踰垣走母陳氏妻焦氏弟沐天澤

沐天潤奔逃城北普吉邨舉家焚死沙定洲威劫巡撫吳兆元奪其印雄據

府事丙戌春追沐天波於楚雄圍之沐天波走永昌洱海道楊畏知傳檄遠

近悉力拒守逾年而楚雄不能拔丁亥三月二十八日孫可望屠交水二十

九日屠曲靖沙定洲解圍楚雄遁歸阿迷遇孫可望兵於蛇花口戰敗集潰

衆守甸革竜孫可望出略迤西各郡縣楊畏知迎戰於祿豐之啟明橋兵敗

被擒脇降不屈孫可望重其人約與共尊明室俾致書通黔國公沐天波先

遣其子沐忠顯至劉文秀隨同往永昌邀之回省四月十八日省中人民先

執阮韵嘉袁士弘檻送楚雄伏誅沐天波歸寸磔徐中和以謝國人沙定洲

據省凡五百五十日李定國尋引兵討佯革竜其地乃沙定洲老巢有九山阻險爲李定國破十月四日峒人降擒沙定洲萬氏歸磔之改阿迷曰開遠改蒙自曰樂新孫可望既據雲南自稱平東王鑄輿朝通寶錢造勅印設部卿科道官臨安縉紳任儀等率衆擁戴尊之爲國主居然夜郎自大也李定國劉文秀艾能奇等與孫可望本儔伍一時雖推崇之各擁兵自雄抗不相下遇事多捍格李定國破佯革竜後衆益憚之孫可望無以威其下思假王朝爵以自尊遂有封王之請科臣金堡引祖制爭之甚力陳邦傅思結強援於滇遣胡執恭矯詔賜孫可望爲秦王此己丑冬事也艾能奇死孫可望併其衆勢益張庚寅冬出師貴陽破定番侯皮熊兵於貴筑北攻遵義忠國公王祥敗走自刎死孫可望復有黔中之地辛卯春楊畏知入覲忿賀九義等肆逆抗疏自劾語侵孫可望上畱以閣臣辦事孫可望怒遣指揮鄭國執楊畏知回黔殺之陳邦傅駐兵武靖州土司中秋八月遣盜刺殺宣國公焦璉

爾其首叛降於定南王孔有德九月引兵襲上二十八日上從南寧登舟擬
移蹕廣南十月七日幸新寧十二月五日至瀨灘七日南寧陷上棄舟就陸
孫可望遣將狄三品陳國能高文貢來迎六年壬辰正月三日至版朝十二

日次富川十三日次沙斗十四日次西洋江十五日次寶月關十六日至廣
南孫可望遣總兵王愛秀上言廣南雖云內地界鄰交趾夷情巨測安隆所

隸貴州晉安州爲滇黔粵三省會區城郭堅固今已修葺行宮具糧儲可朝發夕至

行幸莫此爲宜上從之二十五日發廣南次童卜二十六日次曬利二十七
日次鼎貴二十八日次加浦二十九日次那羊三十日次侄堂二月癸卯朔
次呼馬二日次扁牙三日次板屯四日次板橋五日次筒沙六日幸安隆所
詔改爲安龍府是時分道出師李定國下楚馮雙禮副之由黎平出靖州馬
進忠由鎮遠出沅州會期武岡以圖桂林劉文秀入蜀王復臣副之率張先
壁等由永寧取叙州白文選由遵義取重慶會期嘉定以圖成都疏聞封李

定國爲西寧王劉文秀爲南康王五月李定國進攻靖沅武岡諸州俱卜之駐軍武岡欲乘勝南下慮定南王孔有德躡其後令諸營出新寧過八十里山徑趨全州各遣西勝營張勝鐵騎右營郭有名率精兵由西延大埠趨嚴關嚴關者入桂林要道也馮雙禮兵先至驛湖卒遇北騎力戰斬其驍將進破全州李定國至合諸軍向桂林時張勝郭有名已至嚴關立營關上定南王率數萬騎馳救會日暮引退次日兵薄關下張勝令軍士蓐食就戰北師銳甚象儂歸李定國斬御象者諸軍殊死戰象亦縱橫突陣定南王軍驚潰會大雷風雨如雹逃卒相騰踐伏尸盈野逐北者蹀血而前孔有德退保桂林七月四日諸營士卒援梯登陴城陷定南王聚其妻妾縱火自焚收陳邦傅及其子陳會禹俘至貴州醢之孫可望以李定國所上鹵獲不盡入於滇叙功止及馮雙禮軍心大忿九月李定國北取衡州自南寧陷後胡一清趙印選馬寶曹志建諸部畱屯粵西山谷間聞李定國至翕然響應長岳之間

俱震懼劉文秀之取叙州白文選之取重慶也其時平西王吳三桂已盡開川南各郡聞警回守保寧劉文秀窮力趨之王復臣曰吾師驕矣彼將致死於我以驕兵當死敵能無失乎不聽至保寧王復臣曰毋圍城圍城則師分易弱必敗又不聽張先壁陣于西南軍容燭日吳三桂乘城望曰獨是可襲而取也選騎犯其壘果驚走全軍擾亂披靡王復臣戰歿劉文秀單騎退回孫可望奏削其王爵俾歸雲南自出兵沅州令白文選張虎攻辰州陷之十一月敬謹親王兵至衡州李定國與戰少却退走王率精騎追之過險遇伏中交槍死李定國歛兵守武岡七年癸巳孫可望意忌李定國邀至沅議事將乘間圖之李定國覺其謀率所部竟從東安全州入粵孫可望追於後至花街子遇固山佟土賴兵戰敗引還各以武寶之間爲界李定國得據有廣西與馬寶等由懷集東攻肇慶平南王尙可喜率師來援相持不能克上在安龍府弗獲寧處謂內侍張福祿全爲國曰秦王無人臣禮漸見侵凌得西

府來迎庶可脫於險西府謂李定國也二人密謀之於閣臣吳貞毓翰林蔣
乾昌李元開刑科給事中張鑄御史李頊胡士瑞部郎徐極楊鐘趙庶禹蔡
纘鄭允元周允吉朱義景朱東且任斗墟易土佳等僉以文安侯馬吉翔爲
孫可望腹心出之南寧祭陵十一月命林青陽充使命賚密勅潛往冊封李
定國爲晉王召之迎駕再遣周官申諭勅詞哀切李定國捧讀感極涕零三
軍咸泣下然以行間多故未遑卽作迎鑾之舉會有劉議新者自李定國營
過南寧與馬吉翔談及此事馬吉翔陰使王愛秀報孫可望諷劉議新具疏
奏西藩受疏感激狀以實其言孫可望使人邀遮林青陽周官執至黔并召
馬吉翔質對八年甲午三月鄭國王愛秀至安龍府械繫吳貞毓旋入朝縛
張福祿全爲國出馬吉翔弟馬雄飛已密探同事者姓名先報孫可望竟依
數執之鍛鍊成獄張福祿全爲國張鐫處以極刑蔣乾昌等十四人棄市吳
貞毓以大臣賜自裁上震驚者累日孫可望恨李定國益甚願以擁兵外鎮

不敢輕與樹敵仍厚遇其妻子於雲南李定國亦防孫可望襲己于是年秋
南攻廣東高州破之雷廉俱爲所有九年乙未上在安龍府守將承孫可望
意橫行侮逆歲造開銷冊稱皇帝一員皇后一口月支銀米若干無禮於其
君若此李定國由高涼進攻新會十年丙申新會被圍久平南王尙可喜將
大兵救之李定國兵多病疫敗回南寧將由安龍入滇孫可望先令白文選
促上移黔上慟哭白文選心動曰徐之以俟西府數日李定國至奉上由安
南衛至雲南白文選歸孫可望復使之至曲靖邀李定國時守滇者爲劉文
秀王尙禮王自奇賀九義等劉文秀素怨孫可望聞李定國至私以數騎馳
迎共相盟約與白文選同奉上入雲南居孫可望府中封劉文秀爲蜀王白
文選爲鞏國公王尙禮爲保國公王自奇爲夔國公賀九義爲保康侯馬吉
翔工彌縫仍以文安侯辦事內閣遣白文選回黔慰諭孫可望孫可望奪其
所部兵并鞏國公印然以妻子在滇未敢公爲逆也十一年丁酉春上使張

虎送孫可望妻子還黔孫可望既無內顧慮遂舉兵反初諸鎮之自楚粵至者皆聚於黔然人心離叛多不附孫可望馬進忠馬惟興馬寶與白文選情最密謀助李定國從容爲孫可望言白文選心膺舊人才望出諸將上前爲李定國所脇使其心果外向必不復來今重用之必獲其力孫可望信從乃以白文選爲征逆招討大將軍總統兵馬前行自率大兵隨其後畱馮雙禮守貴州李定國劉文秀全師至三岔相拒九月十四日白文選抵交水距三岔至二十里輕騎走歸李定國軍具言群情歸附可一戰而走也李定國大悅請封白文選爲鞏昌王孫可望聞變欲回馬惟興等又言去一人何足重輕遽爾撤兵恐爲敵笑孫可望又信之曰彼悉衆出拒城中必虛因遣馬寶與漢川侯張勝由尋甸間道襲雲南自將擊李定國十九日兵既交馬惟興先潰走諸軍悉瓦解孫可望大敗逃回貴州馬寶亦趨附李定國惟張勝直抵雲南王尙禮謀翻城應沐天波挾與入朝共守之使不得發張勝知有備

馳回李定國聞報令劉文秀白文選東追自引兵還救遇張勝于渾水塘大戰竟日擒斬之王尙禮自鳩死孫可望至貴州馮雙禮誡之以追兵垂及孫可望挈妻子赴長沙經略洪承疇軍前降馮雙禮斷後掩其輜重與劉文秀白文選同歸雲南論功封馮雙禮慶陽王馬進忠爲漢陽王馬惟輿爲叙國公馬寶爲淮國公賀九義爲廣國公十二年戊戌二月大兵分楚蜀粵三路入黔李定國遣其將劉正國楊武守三坡紅關諸要險以防蜀兵命馬進忠等守貴州四月二十四日劉文秀病卒夔國公王自奇永壽伯關有才反殺總兵徐祐李定國自率兵討之王自奇死有亂兵誅關有才于永昌內亂平而貴州已不守矣大兵由蜀入者是月至三坡劉正國由水西奔回滇晦日取遵義由楚入者自鎮遠抵黔馬進忠等亦走五月蜀兵擊敗楊武於開州之倒流水七月大兵由粵入者抵獨山州十月三路兵俱集信郡王自北至會于楊老堡戒期入滇李定國受黃鉞誓師與馮雙禮扼鷄公背圖復貴州

別遣白文選守七星關抵生界次師示犯遵義以牽制蜀兵十二月蜀兵出遵義由水西以烈趨天生橋入烏撒白文選棄關走回霑益泗城州土官岑繼祿導粵兵入安隆李定國從盤江回師拒戰連敗於安隆之羅炎涼水井撤塞回上聞報發滇都十三年己亥正月四日上駐永昌李定國還黃鉞待罪自請削秩不充二月二日大兵出雲南十五日白文選敗於大理之玉龍關十八日上次騰越李定國設伏潞江高黎貢山有降人洩定國謀二十一日分精甲先蹂躪其伏處而大軍由正路上殺傷相半而李定國不能支走孟定白文選亦走木邦報至騰越乘夜入南甸二十六日抵曩木河離緬境止十里沐天波入諭二十八日始啟關勒從官盡棄所携兵仗而後入是日抵蠻漠於時隨上啟行者無正人君子唯馬吉翔與司禮監李國泰用事三四闖茸輩馮依翕合講譟詆欺上亦無如之何也二月朔緬人以四舟迎上從官水陸分行十八日至井梗白文選以兵入緬二十一日緬人求檄止兵

馬馬吉翔從之五月四日緬人復以舟來迎五日離井梗七日至啞哇城下

次于對河八日駐者梗緬人蓋草房十大間編竹爲城奉上居之餘各誅茅

散處緬婦日來貿易初時饋獻頗豐諸人忘其身在憂危中時或跣足短衣

席地飲博寡廉鮮耻漸爲緬人所輕侮八月望日緬俗朝會之期逼沐天波

往如其臣匍匐行禮沐天波耻之馬吉翔李國泰猶以爲中秋令節酣飲皇

親王惟恭所九月十九日緬進新穀命分給窘者馬吉翔多予其私人鄧凱

忿爭擊之傷足十月造庚子年曆頒於緬人十四年庚子李定國白文選自

孟良分道入緬會於洞武進攻阿瓦擊敗緬兵於瑞羊岳時從官資用盡竭

馬吉翔李國泰碎御寶以給之十五年辛丑二月李定國兵屯洞怕白文選

兵屯象腿各離啞哇城八十里合擊緬兵大敗之擬造浮橋渡江至者梗迎

上上而不果引還洞武五月二十二日緬酋莽猛白弒其兄自立七月十八

日請諸從人過河喫水十九日馬吉翔李國泰盡拉松滋王沐國公已下

共四十有二人往就盟緬酋以兵圍殺之惟鄧凱傷足不能行得免上經險
逾時始定十一月八日平西王吳三桂兵至木邦白文選迎降二十一日入
緬甸境十二月朔日吳三桂兵至舊晚坡三日未刻緬人請上移蹕皇太后
皇后皇太子隨行二更渡河到營始知爲平西王軍前也明年壬寅四月二
十五日上崩於雲南六月二十七日李定國病卒於猛臘至是而明統亾

刊

行

舟山始末

舟山四面皆海元爲昌國州或云句踐欲置吳王夫差於甬句東卽此地也崇禎年省入定海叅將黃斌卿守其地斌卿興化衛人後歷陞廣西總兵官南都亾遁歸得附隆武勸進上言舟山爲海外巨鎮西連越郡北綽長江爲進取要地宜設重兵鎮守上從之封斌卿伯爵賜劔印聽其率兵屯彼便宜行事丙戌六月浙兵潰監國魯王由紹興入海富平將軍張名振令中軍方簡扈從至舟山黃斌卿不納飄泊外洋鄭彩遣平南將軍陳輝迎王入閩界駐中左所王諱以海高皇帝十世孫父諱壽鏞崇禎十六年北兵破兗州自縊死十七年國變南下弘光駐王於台州乙酉六月浙東熊汝霖孫嘉勛馮元璉錢肅樂諸公起義張國惟陳函輝朱大典等迎王監國以丙戌爲魯元年七月延平破隆武走汀州爲追騎所及崩於福京十二月鄭成功建義廈門無意崇奉監國仍稱明年丁亥爲隆武三年於是鄭彩奉王次長垣亦稱

明年爲監國魯二年海上遂有二朔丁亥王在長垣進鄭彩爲建國公張名振爲定西侯命翰林張煌言監張名振軍戊子監國魯三年王次閩安鎮己丑監國魯四年王次沙埕初時三吳義旅走蠟書求援於海上黃斌卿不應張煌言勸張名振就其約連艘二千餘次白米沙洗砲龍驚舟師震蕩張名振於洪濤中遇蓬爲援登岸脫歸黃斌卿將謀害之因去舟山而營於南田平西將軍王朝先駐蛟關黃斌卿命朱玖陸偉劫之橫水洋王朝先跳水免妻子死焉張名振厚卹之亦歛餘兵別屯鹿頸兩人恨黃斌卿甚交思所以謀之未發也已丑六月張名振復健跳所七月鄭彩棄王去兩年來閩地勝沒不常王得栖栖萍泊至是而閩界盡失無所歸焉張名振同王朝先阮進迎王次健跳所王封王朝先爲平西伯而黃斌卿始終不奉王命三人遂合辭請討之九月二十四日力攻舟山黃斌卿勢窮赴海死十月己酉王率文武諸臣始駐舟山庚寅監國魯五年周崔芝等分屯溫之三盤以相犄角辛

卯監國魯六年二月乙卯張名振襲殺王朝先以其貳己也七月北師會伐
舟山松江張天祿出滌闕金華馬進寶出海門陳錦總督全師出定海八月
張名振聞警會議堵禦之策阮進獨當定關張煌言率兵斷北洋張名振督
諸將遏南來之師安洋將軍劉世勳守城王登舟泊道頭丙寅天大霧敵艦
悉抵螺頭門守陣者不知也阮進發火器投北舟風迴帆轉火傷進面創甚
被執九月丙子城陷劉世勳等率義勇巷戰被殺張名振兄名甲名揚母李
氏妻馬氏抱少溪公木主一門縱火焚死大學士張肯堂冠帶焚香北面拜
同妻媳女孫俱就縊禮部尙書吳鍾巒藏印及所註易經于懷積薪自焚吏
部侍張永祜執見北帥令剃髮曰吾髮可斷何待今日踞坐受刃僕負其尸
出流血露服哭曰吾主生前好潔今無知耶血卽止兵部尙書李向中居憂
城外爲北兵搆得衰經就戮通政使鄭遵險兵科給事董志寧兵部郎中朱
耆時兵部主事林瑛江用楫禮部主事董立兵部主事李開國朱萬年顧珍

工部主事顧宗堯中書舍人蘇兆人工部所正戴仲明錦衣指揮王朝相內
官劉朝定西叅謀顧明楫諸生林世英俱死之北帥留巴臣興屯守舟山壬
辰監國七年張名振與張煌言扈王復至中左所尋居金門張名振張煌言
遂依延平王麾下癸巳三月王去監國號張名振請於鄭成功與兵二萬人
北上進營崇明破京口入長江題詩金山寺有十年橫海一孤臣之句兵勢
頗振誠意伯劉孔昭等皆歸焉冬初回廈門見鄭成功暢其所談更益之以
兵甲午正月六日再至京口劫殺相持轉鬪無已叅將阮姑娘歿於陣復攻
崇明敗績姚志卓戰死城下乙未八月延平王遣阮駿陳雪之等攻復舟山
張名振入城祭母哀感三軍十一月寢疾二十八日夜太星隕於海光芒有
聲亥刻名振起坐擊床箠連呼先帝而逝丙申八月二十六日舟山再陷歲
丁酉遷其民入界內監國至壬寅十一月十六日薨於金門諸舊臣葬之以

禮

延平始末八月初二日聞警

泉州南安人鄭芝龍少居東石其地瀕海有李習者商舶往來日本國豪於財鄭芝龍曲謹事之李遂以妻子托居芝龍家會習死芝龍乾沒其囊橐糾衆寇行海上與倭熟習久因娶日本國長崎王族女爲妻以故橫愈甚後就撫於巡撫沈猶龍挈其妻還東石第宅縱橫數里富甲全閩製生犀黃金爲甲每出則百人與俱穿關一色莫辨其孰爲芝龍也久西六月隆武勸進移建府第於安海城內窮極閎麗先是廣賊劉香海盜李魁奇之餘黨後出而更銳犯小程犯長樂再犯廣之海豐詭請降巡撫熊文燦誤信之崇禎七年四月遣道臣洪雲蒸康承祖叅將夏之本張一杰同往招撫爲羈留者彌年出犯如故朝命鄭芝龍討之合兵夾擊於五虎門外之定海所劉香挾道將出船止兵洪雲蒸大呼曰吾矢志報國急擊之勿失遂遇害鄭芝龍弟芝虎勇捷甚覘香乘巨艦意氣指揮以輕舟趨艦而上直前取劉香左右辟易莫

敢動香亦錯愕格芝虎兵刃墮兩人徒手而搏相持入海死一時焚溺殊甚

康承祖與二叅將脫歸鄭芝龍并降其衆軍勢益張子鄭森於崇禎末年肄

業南雍慕錢牧齋夫子門牆願執弟子禮公字之曰大木弘光朝封鄭芝龍

爲南安伯隆武封侯爵晉平國公鄭森陸見年才二十一丰采掩映上大悅

賜國姓改名成功封忠孝伯統領禁旅照駙馬例行事延汀之變北師入閩

鄭芝龍退屯安海議降成功哭諫不聽竟單騎北行子弟莫有從之者丙戌

十二月朔鄭成功設高皇帝神位於烈嶼會文武臣定盟恢復丁亥仍稱隆

武三年移兵南澳五月於廈門中左所設演武塲七月合定國公鄭鴻逵兵

攻泉州十月從大學士路振飛曾櫻黃公輔陳洪謐四人議頒明年隆武四

年戊子大統曆用文淵閣印之戊子稱隆武四年遣光祿寺卿陳士京入

覲上於廣東肇慶行在所己丑陳士京返詔封鄭成功爲延平王始稱永曆

二年庚寅鄭成功南下辛卯二月泉州守將偵廈門單弱襲破之曾櫻自縊

諸臣咸避於浯嶼鄭成功自南返泉州襲者退壬辰二月圍漳州九月北師
援漳島兵失利癸巳島兵下潮州以定海李孟孟署太守事甲午四月潮州
復失十一月發水陸師應西寧王李定國於粵東乙未五月援粵之師敗歸
十一月遣英義伯阮駿總制陳雪之攻舟山臣與舉城降丙申正月十一
日始頒永曆十年大統曆五月改廈門中所爲思明州八月二十六日舟山
復陷阮駿陳雪之死之丁酉十二月島上火藥局災戊戌正月行在遣使賚
璽書從安南出海通問授張煌言兵部左侍郎兼翰林院學士其餘除授有
差鄭成功與張煌言謀北伐抵羊山山故有龍祠海舶過者以生羊祭即放
羊於山日久繁孳見人了不畏避軍士爭上取之迅風猝起舟舡自相撞擊
義陽王溺焉旋即返旆己亥五月全師直指金陵張煌言率所部義旅先驅
入江抵瓜州乘勢克其城鄭成功南伐鎮江所在震動張煌言泝江而上迎
降甚衆六月二十八日至觀音門鄭成功亦率鎮江水師畢集七月朔哨卒

掠取江浦五月蕪湖降書至鄭成功謂張煌言是爲上游要害倘留都不能

旦夕下無人控阨於此則江楚援兵日至矣公宜急往鎮之七日張煌言趨

蕪湖傳檄遠近江南北凡府四州三縣二十四無不望風納款常鎮屬邑亦

觀望爲降計是時島兵驕甚樵蘇四出營壘多虛時或執冰而踞城中偵知

其疎放輕騎突乘間破其前屯鄭成功倉卒移營質明軍灶未就滿漢兵已

傾城出戰島人獸駭鼠奔鄭成功順流歸海并撤京口之師張煌言至銅陵

與楚兵遇衆亦潰變姓名從建德祁門山中出天台以入於海鄭成功之敗

而歸也慮廈門單弱不足恃始謀所遷庚子紅夷通事何斌謂鄭成功曰王

何不取臺灣此是君家故土取之則不患無地無餉矣臺灣者從古不通中

土初未著其名何喬遠閩書稱爲東番附於志末其地周遭環海崇山峻嶺

橫亘其地北自鷄籠南至浪嶠海岸千餘里東西如之永樂中鄭和下西洋

三泊鷄籠淡水卽其地也嘉靖間倭寇擾閩俞大猷戚繼光擊敗之退屯于

此號北港遂爲倭之所踞萬曆末紅夷泊舟此地廣募貿易知鄭芝龍爲日本贅婿挽其與倭買地鄭芝龍乘間以利誘閩之飢民人給三金三人共給牛一頭用海船載至北港令其芟舍闢地遂成上田歲收倍穫衣食之餘納租於鄭氏紅夷與遷民雜處因循有年相忘久之鄭芝龍歸北後紅夷奄有其地築臺爲城始稱臺灣以澎湖爲門戶彭湖水勢溜下海船至此須易船而入故險而易守辛丑春鄭成功率舟師過澎湖值水漲揚鈴直至臺灣從鹿耳門入內爲北線頭沙隄其港淺狹僅容一二舟魚貫行夷故不甚設備其時潮汐驟增數丈巨艦得以並進降赤崁守夷三百人四月進攻王城擊以大砲城堅不能壞鄭氏所遷之民云城外高山有水自上而下達於城濠貫城而過城中無井泉所仰而飲者唯此若絕其水源不三日告困矣從之紅夷乞降請以大船遷其寶貨去延平遂王其地改爲東寧又號東都設立承天府天興萬年二縣規模草創經營畧就明年壬寅五月初八日王殂子

經 嗣辛酉經 卒子克塽 嗣癸亥六月克塽 率衆內附臺灣從此遂入中國版
圖矣

跋

往在海上得劫灰錄一帙紙色黝晦古香鬱然審其鈐識爲吾吳舊家鈔藏
精本累經流轉而入于予予因頗寶貴之且其文叙述甚工好表彰節義事
用意尤深遠與諸凡野史不同故每浪遊數千里襍被之外必携是書與俱
每過廢墟殘壘風景不殊山河斯異聽父老話桑海舊事則開卷讀之與相
印證未嘗不淚潛潛下也竊意其人必有心君子身遭亡國之痛目覩南疆
禍變之慘故紀載其事以存殘局于不朽其於故國可謂忠厚而知所報本
者矣顧獨不著其姓氏意者文網峻密多所忌諱故不得不委曲以求全歟
然吾讀劉繼莊廣陽雜誌謂著此書者實爲馮甦字再來且謂何督師贈王
乃忠襄而非中湘引吳漢槎語爲證予攷再來文字不概見惟黎美周蓮鬚
閣集中有一序知其爲浙江天台人而宦粵者此書首稱珠江寓舫偶記豈
卽其時耶鄧君枚子爲刊是書因書數語于此丙午六月望日吳江陳去病

跋

刊

行

光緒三十二年七月二十日首版

光緒三十二年七月二十日發行

(國粹叢書劫灰錄)

定價洋三角

著者

珠江寓舫偶記

印行者

上海鐵馬路北愛而近路
國學保存會

發行所

上海四馬路東惠福里
國粹學報館

